



# JORNAL

## do

# Parlamento Nacional

VI LEGISLATURA

1.ª SESSÃO LEGISLATIVA (2023-2028)

## REUNIÃO PLENÁRIA DE 13 DE JANEIRO DE 2025

**Presidente:** Ex.<sup>ma</sup> Sr.<sup>a</sup> Maria Fernanda Lay

**Vice-Presidentes:** Ex.<sup>mo</sup> Sr. Alexandrino Afonso Nunes

**Secretária:** Ex.<sup>ma</sup> Sr.<sup>a</sup> Virgínia Ana belo

**Vice-Secretárias:** Ex.<sup>ma</sup> Sr.<sup>a</sup>

## SUMÁRIO

Sr.<sup>a</sup> Presidente Maria Fernanda Lay, hafoin verifica quórum, declara aberta sessão plenária ne'e iha tuku 9 liu minuto 25 no halo kedas leitura ba agenda serbisu loron ne'e nian.

**Antes Ordem do Dia** – Sr.<sup>a</sup> Deputada Helena Martins Belo, husi Partido FRETILIN, hato'o declaração política ne'ebé foca liu ba setor saúde, ho ênfase ba atendimento, falta equipamento no *stockout* ai-moruk. Além de ne'e, questiona mós

kona-ba número mortalidade ne'ebe aas iha HNGV no evicção ne'ebé hala'o iha Fomento II.

Tuifalimai, husi KHUNTO, Sr. Deputado António Verdial de Sousa halo declaração política ne'ebé toca ba importância husi desenvolvimento infraestrutura básica sira, liuliu estrada, eletricidade, bee moos no saneamento.

Bá fali Bancada PD, iha ninia vez, liuhusi Sr. Deputado António da Conceição «Kalohan», halo declaração política kona-ba evicção ka despejo administrativo ne'ebé SEATOU halo daudaun, hodi bolu atenção ba Governo kona-ba ninia impacto social no económico, no apresenta mós hanoin balu kona-ba forma ne'ebé di'ak liu atu halo evicção ka despejo administrativo iha futuro.

Declaração política ikusliu mak husi Bancada PLP, iha-ne'ebé, Sr.<sup>a</sup> Maria Angelina Lopes Sarmento, hodi bancada ne'e nia naran, condena evicção ou despejo administrativo forçado ne'ebé SEATOU halo.

Iha intervenções diversas, Senhor Deputado sira ko'alia kona-ba: papel PNTL no F-FDTL nian hodi garante paz no estabilidade iha período Natal no Tinan Foun nian; polémica rai iha Maumeta, Liquiçá, ne'ebé Sr. rai Loos ocupa; construção estrada urbana ne'ebé concentra de'it iha Díli; distribuição pacote fiscal husi Ministério das Finanças ba linha ministerial sira; lançamento fatuk dahuluk ba construção Irrigação Maliana II; labarik sira-ne'ebé continua fa'an sasán iha dalan públiku balu iha Dili laran; evicção ka despejo administrativo ne'ebé SEATOU halo; escola pública filial balu ne'ebé Ministério da Educação sei taka; atendimento iha HNGV no apresentação farda foun ho forma *fashion show* iha hospital ne'e; ato foti vendedor sira-nia sasán fa'an nian husi pessoal balu husi Gestão de Mercado; Disputa rai iha fronteira Naktuka; eletricidade ne'ebé mate-lakan; preço bilhete avião ne'ebé karun no ema soe lixo iha fatin ne'ebé la apropriado.

Hafoin Senhor Deputado sira halo intervenção, tuirmai Sr. Vice-Ministro dos Assuntos Parlamentares, Adérito Hugo da Costa, hatán ba questão sira-ne'ebé Sr. Deputado sira foti.

**Ordem do Dia** – Aprovação das edições do *Jornal do Parlamento Nacional*, I Série-A n.º 14, n.º 15 e n.º 16.

Senhor Deputado no Senhora Deputada sira-ne'ebé halo intervenção mak: Helena Martins Belo (FRETILIN), António Verdial de Sousa (KHUNTO), António da Conceição «Kalohan» (PD), Maria Angelina Lopes Sarmento (PLP), Olinda Guterres (KHUNTO), Leandro Lobato e Cedelízia Faria dos Santos (CNRT), Manuel Henrique Noronha (PD), David Dias Ximenes «Mandati» (FRETILIN), Gabriel Soares e Maria Gorumali Barreto (CNRT), Luís Roberto da Silva (KHUNTO), Florentino Ximenes da Costa «Sinarai» (FRETILIN), Firmínio Taequi (CNRT), Antoninho Doutel Sarmento (FRETILIN), Domingos Augusto «Deker», Aliança da Conceição Araújo e Anacleto Freitas (CNRT), Dário Madeira (FRETILIN), Natalino dos Santos Nascimento (CNRT), Sancha Margarida Tilman (PD), Abel dos Santos (PLP), Joaquim dos Santos «Boraluli» no José da Cruz (FRETILIN), Maria Rosa da Câmara «Bisoi» (CNRT) no Nurima Ribeiro Alkatiri (FRETILIN).

Sr.<sup>a</sup> Presidente taka sessão plenária ne'e iha tuku 13 liu minuto 19.

Sr.<sup>a</sup> **Presidente** (Maria Fernanda Lay): — Distintos Deputados, muito bom dia ba ita hotu. Ha'u convida ho respeito ba distinto Deputado sira bele hola fatin para verifica quórum. Muito obrigado.

*Horas hatudu tuku 09 liu minuto 25.*

Distintos Deputados, temos o quórum deliberativo, e ha'u hakarak hato'o katak iha ita-nia reunião plenária de segunda-feira, 13 de janeiro 2025, iha Período de Antes da Ordem do Dia, iha:

Primeiro, informação sobre visita privada de S. Ex.<sup>a</sup> o Presidente da República à Suíça;

Segundo, informação sobre o relatório de visita oficial de S. Ex.<sup>a</sup> o Presidente da República ao Bangladeche, entre 14 e 18 de novembro de 2024;

Terceiro, iha informação sobre o resultado da eleição dos representantes do órgão de comunicação social, ne'ebé ita mós precisa indica ita-nia membro;

Quarto, a distribuição e apreciação do relatório de fiscalização da Comissão de Saúde, Segurança Social e Igualdade de Género aos municípios de Aileu e Viqueque;

Quinto, a declaração política das bancadas parlamentares da FRETILIN, do KHUNTO e do PLP;

Sexto, intervenções diversas dos Srs. Deputados;

Sétimo, a intervenção do Sr. Vice-Ministro.

E, por último, iha período da ordem do dia, aprovação das edições do *Jornal do Parlamento Nacional*, iha-ne'e tuir série ne'ebé hato'o mai ne'e.

Ne'ebe, distintos Deputados, iha Distinto Deputado balu que ha'u seidauk hetan depois de Natal ho Ano Novo, ha'u ha'u deseja um bom Ano ba ita hotu, espera katak tinan foun ne'e lori mensagem di'ak ba ita hotu. Entretanto, ha'u nota katak iha Deputado barak mak moras liga ho vírus ne'ebé la'o hela ho época da chuva, ne'ebe ita tem que cuidado.

Mais uma vez, iha mós mensagem de Santo Padre ne'ebé ha'u haruka fahe ba distinto sira hotu. Espera katak mensagem sira-ne'e lori paz no estabilidade ba ita hala'o ita-nia serbisu iha Instituição ida-ne'e. Mais uma vez, um bom Ano para todos nós, e espera katak este ano nos traga mais sorte, mais felicidade e saúde para todos nós. Ida-ne'e mak importante.

Hodi nune'e, distintos Deputados, iha pedido ida husi Bancada FRETILIN, ne'ebé hato'o katak atu assegura fali o regular exercício da Sr.<sup>a</sup> Deputada Cristina Yuri Rebelo dos Santos da Costa, ne'ebé lori tempo naruk iha férias hodi hala'o tratamento saúde.

Bem-vinda ba Sr.<sup>a</sup> Deputada na retoma do seu mandato, espera katak tinan ne'e fó saúde di'ak e continuação de boa saúde ba Ita-Boot no mós ba sira seluk ne'ebé moras. Ne'ebe ha'u anuncia kedas ida-ne'e, a retoma do mandato da Sr.<sup>a</sup> Deputada.

Distintos Deputados, iha matéria sira hotu ne'ebé hatu'o ne'e, kona-ba n.º 2, «A informação sobre o relatório», hanesan baibain, o Sr. Presidente da República fó nia relatório de visita ba Bangladeche, mas ha'u tau iha Biblioteca, para quem quiser por solicitação, bele husu nia cópias. Ne'ebe, dala ida tan, informação ne'e mak ha'u hatu'o.

Nune'e ita tama kedas ba «Declaração política das bancadas parlamentares».

Ita fó liu kedas ba Bancada da FRETILIN.

Halo favor.

Sr.<sup>a</sup> **Helena Martins Belo** (FRETILIN): — Obrigada ba oportunidade.

Bom dia ba ita hotu.

«Excelência Presidente do Parlamento Nacional, Mesa da Presidência do Parlamento Nacional, caros Deputados e Deputadas, mídia, assistente, povo Maubere e Buibere sira hotu.

Excelência,

Colapso iha setor saúde sai preocupação boot ba sociedade, povo no Nação ida-ne'e. Setor saúde sai hanesan fundamento importante iha desenvolvimento nação ida nian, tanba saúde ne'ebé di'ak nu'udar direito humano ne'ebé labele negocea. Maibé, saida mak ita haree iha Governação Dasiak ida-ne'e irónico tebes, povo barak tem que lakon nia vida iha momento sira iha esperança atu recupera sira-nia saúde hodi bele moris, realidade diferente tebes ho buat ne'ebé família no paciente sira hein.

Estado no Governo ida-ne'e, tuir loloos, iha atu protege nia povo, maibé realidade hatudu katak oho fali nia povo, liuhusi serviço saúde ne'ebé la adequado no falta equipamentos saúde hodi atende moras sira.

Imagem ida-ne'e hatudu momoos katak Timor-Leste iha setor saúde iha agonia nia laran no monu daudaun ona tanba atendimento ba serviço saúde la iha qualidade, no, ema barak tem que lakon sira-nia vida iha horas no minuto balu nia laran.

Hanesan iha fulan-janeiro to'o novembro 2024, caso mortalidade paciente Hospital Nacional Guido Valadares paciente liu 600 mak lakon vida durante baixa durante horas 48 nia laran, tuir médico sira-nia haree, ne'e la tuir ona padrão normal tanba causa ona husi menos facilidade no equipamento saúde.

Timor-Leste nia fragilidade iha setor saúde, ne'ebé Governo atual hatudu ba povo, katak equipamento médico sira-ne'ebé utiliza caduca ona, ai-moruk sira-ne'ebé dala barak hotu no pessoal médico ne'ebé la adequado mak sai problema ne'ebé sociedade no povo ne'e tem que hasoru. Iha caso balu paciente sira mate tanba atraso iha tratamento, erro médico ne'ebé acontece tan negligência ka tanba facilidade la suporta tratamento ba sira-nia condição médica sira.

De facto, Hospital Nacional Guido Valadares facilidade no equipamento saúde barak mak la iha no avaria, hanesan: *CT Scan*, ai-moruk, reagente sira, seluk barak mak *stockout*. Tuir loloos Hospital

Nacional Guido Valadares mak atu fornece serviço di'ak ba povo compara ho centro iha saúde área rural sira. Oinsá ema bele fiar ita-nia Hospital se sira la hetan ai-moruk ne'ebé sira precisa tuir tempo? Hospital mak sai fatin ne'ebé ita tem que sente seguro bainhira sofre moras, maibé saida mak povo Maubere hasoru agora?

Hospital no centro saúde barak mak la bele fornece tratamento adequado, tanba ne'e, hakarak ka lakohi, doutor no enfermeiro sira transfere paciente sira mai iha Hospital Nacional Díli hodi hetan tratamento adequado, no fim, barak mak tem que lakon vida. Mate ne'ebé acontece tanba Hospital sira la preparado atu trata paciente sira tuir tempo no ho di'ak sai nu'udar evidência katak iha buat ruma la'o la loos iha gestão no alocação orçamento ba setor saúde. Nune'e mós precisa tau atenção ba qualidade cuidado nian, formação ba pessoal médico sira no gestão sistema ne'ebé eficiente.

Governo tem que sério hodi garante katak orçamento ne'ebé aloca ba setor saúde to'o duni ona ba sira-ne'ebé precisa. La'ós atu harii de'it infraestrutura, maibé mós atu hametin sistema tomak, inclui qualidade serviço no bem-estar ba pessoal médico sira.

Atu alerta de'it iha Uma-Fukun ida-ne'e para povo Timor laran tomak rona no sente, veteranos ne'ebé riin ba Nação, bainhira hetan moras, Governo atual dehan «junta médica la iha», maibé ema balu ne'ebé moras bosok de'it, Estado aluga avião privado hodi halo tratamento iha rai-li'ur. Veterano ne'ebé funda Nação ne'e de'it halo ona hanesan ne'e, satán povo kbiit-laek no lian-laek sira.

Excelência,

Pergunta mak ne'e: tansá mak iha ona era modernização, facilidade no equipamento mesak moderno, povo tem que mate? Orçamento ne'ebé Governo aprova ba setor saúde halo saída? Dehan hola ai-moruk no equipamento essencial sira, agora iha-ne'ebé? Sr.<sup>a</sup> Ministra Saúde iha capacidade ka lae halo gestão ba setor Saúde? Keta Ita-Boot hanoin katak ema mate ne'e considera hanesan animal karik? Governo iha obrigação atu garante acesso ba saúde ne'ebé justo, equitativo no ho qualidade, labele husik setor saúde ne'ebé importante ida-ne'e hetan negligência tanba de'it indiferença ka falhanço gestão husi incapacidade Sr.<sup>a</sup> Ministra Saúde iha IX Governo ida-ne'e.

Despejo ne'ebé IX Governo, liuhusi equipa conjunta SEATOU, halo ba residente sira-ne'ebé hela iha Fomento II laho sentimento humano, la haree ba aspeto saúde, educação, economia labarik sira-nian.

Daudaun ne'e labarik barak mak sai vítima ba evicção forçada ne'ebe Governo irresponsável ida-ne'e halo ba nia povo kbiit-laek iha Fomento II. Situação obriga sira hela no toba iha ponte okos, balu hela iha uma mahon, sei aumenta número ema moras ba ema barak, liuliu ba labarik sira, tanba anin, udan no maho-been. Vítima barak mak halerik, dehan: «hasai ami iha tempo udan, labarik barak mak moras», maibé Primeiro-Ministro ho membro sira finge diuk no la rona vítima sira-nia halerik. Ida-ne'e mak hahalok original IX Governo nian.

Sr. Primeiro-Ministro, Xanana, hatene mak trata lixo ho digno, maibé trata ninia povo aat liu fali animal. Satán Primeiro-Ministro, Sr. Xanana, hateten ba povo sira hela iha ponte okos: «imi bá hela iha BP7». Keta ita-boot haluha ona karik, iha momento seidauk ukun, dehan: «Estado ida-ne'e iha tan povo iha». Povo la'ós ema rico de'it, povo mak sira kiak no kasian ne'e, maibé agora ukun tiha nu'usá mak duni fali povo hanesan animal?

Sr. Primeiro-Ministro, Xanana, ami hakarak husu: ligação ho evicção ba iha BP7 mak saída? Sr. Xanana, nu'usá mak Ita-Boot ódio loos FRETILIN?

Iha sorin Ita-Boot haruka SEATOU halo evicção ba povo nia uma, iha sorin seluk Sr. Xanana finge hakuak povo hanesan ema inocente ida.

Ita hotu hatene katak desenvolvimento ne'e importante ba progresso nação ida nian, maibé desenvolvimento ne'ebé sacrifica direito cidadão ne'e mak forma injustiça ida. Desenvolvimento ne'e labele haree de'it husi perspetiva infraestrutura ka benefício económico de'it, maibé tem que fó mós atenção, ninia impacto ba comunidade sira-ne'ebé vulnerável, liuliu saúde labarik sira-nian, tanba sira mak futuro Rai ida-ne'e nian. Até povo balu halerik no tanis dehan, «labarik mak futuro Nação nian, agora sira la bele bá escola, ne'e oinsá?».

Hodi hasoru questão despejo ida-ne'e, Bancada FRETILIN sei la nonook de'it, Governo tem que hola parte iha solução, la'ós halo parte iha problema.

Bancada FRETILIN apoia política sira-ne'ebé favorece ema ki'ik no kiak sira, ne'ebé fornece espaço ba diálogo entre Governo no residente afetado sira. Ita mós tem que fó prioridade ba princípio justiça social nian iha processo planeamento no desenvolvimento hotu-hotu, hodi nune'e la iha parte ida mak sente desvantagem ka husik hela iha kotuk.

Pergunta mak ne'e: Governo halo evicção ba nia povo, sá solução mak Governo ne'e halo ba nia povo? Será que tula de'it ba ida-idak nia município, sem cria condição? Oinsá Programa Ministério do Desenvolvimento Rural e Habitação Comunitária atu halo construção Uma Digno ba Povo, ne'e mak sai solução ba comunidade afetada husi evicção sira hodi hela?

Segurança sira-ne'ebé serviço iha Hospital Nacional Guido Valadares questiona mós sira-nia salário anual. Loloos tuir salário básico, maibé parte gestão ko'a sira-nia salário cada fulan ida ho montante 50 USD. Ita hotu hatene katak knaar segurança iha hospital importante tebes, hamenos salário sira-nian bele fó impacto direta ba qualidade serviço iha Hospital. Gestão Hospital Nacional Guido Valadares nian tem que buka solução construtiva atu gere custo operacional sira, nune'e la prejudica trabalhador sira-ne'ebé halo papel importante ida hodi hametin ambiente hospital ne'ebé seguro no ordenado.

Excelência,

IX Governo Constitucional ho nia aliado sira dala barak alerta iha mídia, iha Parlamento no iha público dehan katak setor saúde di'ak hela. Bainhira Bancada FRETILIN questiona iha Parlamento

Nacional, bancada do Governo ho ninia aliado sira sempre nega no desmente katak bancada oposição laran moras ba governação ne'e.

FRETILIN, horiuluk horiwa'in, sempre defende direito povo nian no tau importância ba povo nia di'ak. Ne'e compromisso lulik ne'ebé FRETILIN halo ho ninia povo Maubere, tanba ne'e ami sei la nonook. Mesmo que Governo ida-ne'e falun lia-loos, ami sei toca nafatin iha Uma-Fukun ida-ne'e, iha público, erro ne'ebé Governo atual ho nia aliado sira falun ba povo Maubere, liuhusi retórica no drama ne'ebé imi halo iha sociedade no público nia leet.

Bancada FRETILIN convida povo tomak, inclui sociedade civil ne'ebé defende direitos povo kbiit-laek nian, mai ita luta hamutuk ba futuro ida-ne'ebé saudável, ba povo ida-ne'ebé próspero no ba sistema saúde ida-ne'ebé serbí duni parte hotu-hotu nia necessidade laho discriminação...

Sr.<sup>a</sup> **Presidente**: — Muito obrigada.

Sr.<sup>a</sup> **Helena Martins Belo** (FRETILIN): — ... Tanba ne'e tempo to'o ona ba ita atu, coletivamente, exige mudança sira-ne'ebé real no substantivo liu iha ita-nia sistema saúde tanba ne'e compromisso político IX Governo halo iha momento campanha eleitoral iha fatin-fatin dehan, sei hadi'a sistema hotu-hotu ne'ebé...»...

Sr.<sup>a</sup> **Presidente**: — Sr.<sup>a</sup> Deputada, bele conclui!

Sr.<sup>a</sup> **Helena Martins Belo** (FRETILIN): — ... Um minuto atu conclui, Presidente.

«... VIII Governo halo, maibé realidade, ukun tiha povo nafatin halerik ba buat hotu.

Governo tem que sério hodi garante katak orçamento ne'ebé aloca ba setor saúde to'o duni ba necessidade, la'ós fahe privilégio ba malu no, liuhusi adjudicação direta, fó projeto ba malu, tanba ne'e realidade hatudu katak povo mak sai vítima ba ukun ida-ne'e no ai-moruk nafatin *stockout*.

Ikusliu, atu hatete de'it katak Hospital Nacional Guido Valadares transforma fali ba fatin *fashion show* hanesan iha governante sira halo *show* iha fatin-fatin hodi haterus povo liuhusi evicção no balu mosu mai hanesan herói ka anjo ida mai salva imi.

Povo tem que matan moris neon-na'in, keta fiar diabo subar iha anjo nia kalilin hodi habosok no haterus imi!».

Obrigado.

Sr.<sup>a</sup> **Presidente**: — De seguida, ha'u fó kedas tempo ba Bancada do KHUNTO.

Ha'u husu ho respeito ba declarantes das bancadas parlamentares atu tau matan ba tempo porque selae ita tempo la to'o para hodi halo serbisu sira seluk.

Ne'ebe, halo favor, tempo ba Bancada do KHUNTO.

Sr. **António Verdial de Sousa** (KHUNTO): — Muito obrigado, Sr.<sup>a</sup> Presidente.

Bom dia, Sr.<sup>a</sup> Presidente e componente da Mesa, distintas Deputadas e Deputados.

Obrigado pelo tempo, bom dia a todos e a todos nós que estamos presentes nesta Casa Magna, as minhas saudações fraternais.

Ohin, iha Uma Democracia ida-ne'e, tanba dever no obrigação moral, continua hato'o ami-nia declaração política hodi hafanun Governo no ita hotu rona hodi hamatan ba povo nia halerik.

«Distintos Deputadas no Deputados, nune'e mós rona-na'in iha Timor laran tomak mak Bancada KHUNTO respeita, infraestrutura hanesan estrada nu'udar pilar importante ida iha desenvolvimento nacional tanba dalan mak facilita atividades económicas, movimentação social sira, inclui transportações. Estrada aat la'ós novidades foun ba povo Timor tomak, ita reconhece Ministério das Obras Públicas hadi'a ona estrada iha nível nacional, especial iha bairro-bairro capital Díli laran nian, município, posto administrativo no suco balu, maibé quase iha fatin barak mós sei grave hela.

Estrada aat iha território nacional sai ita hotu nia preocupação, no ohin, loron dahuluk iha tinan 2025 nian, Bancada Kmanek Haburas Unidade Nacional Timor Oan hakarak informa katak estrada sira-ne'ebé grave no prioridade liu, entre sira seluk, ita ladauk tau iha plano hodi hadi'a, maibé rona liu companhia, família no *broker* sira, hodi bá hadi'a uluk estrada balu ne'ebé ninia beneficiário mínimo tebes no ladauk tama iha categoria prioridade dahuluk.

Iha-ne'e ami hakarak apresenta factos balu atu ita hotu buka ninia lógica no hatene ninia veracidade ho ninia exemplo concreto, mak hanesan:

Ida, construi uluk *jalan tol* iha Suai do que hadi'a estrada husi Ainaro bá Suai ne'ebé quase aat total; hadi'a uluk estrada Suco Com ba Asalainu do que hadi'a estrada protocolo ba nacional husi Posto Lautém ba Município Lautém to'o ba Posto Iliomar. Maibé, povo Lautém tem que agradece tanba IX Governo Constitucional ne'e tau ona osan hodi hadi'a, la tama lógica maka hadi'a uluk estrada ida Aldeia Codo ba Lereira, Suco Maina 1, Posto Lautém nian ho alcatrão *cold mix* do que hadi'a uluk estrada ne'ebé liga husi posto administrativo ba suco haat, Serelau, Maina 2, Baduro no Maina 1 iha Posto Lautém ne'e rasik, Município Lautém.

Bancada KHUNTO reforça liután preocupações comunidade sira husi Suco Selerau, Baduro, Maina 2 e Maina 1 iha Posto Administrativo Lautém, conhecido ho naran zona Alto Laleno, ne'ebé uluk tempo resistência sai mós hanesan fatin ida ba Comandante em Chefe das FALINTIL, Maun Boot Kay Rala Xanana Gusmão, hodi helik an bá, no fatin ne'e naran Lua Pala, no fatin ne'e uluk sai base ba funu-na'in sira. Ho nune'e maka Bancada KHUNTO husu ba IX Governo Constitucional atu tau hela matan bá.



Informação ne'ebé Bancada KHUNTO simu husi terreno katak autoridade suco haat submete ona proposta ba Ministério das Obras Públicas iha VIII Governo Constitucional nia mandato, no altura ne'ebá ita consegue loke concurso público ba *consultant* sira, no *consultant* ida hanaran *Detile Consultant, Lda.* maka sai hanesan manán-na'in.

Bancada KHUNTO mós preocupa tebes ho projeto emergência sira-ne'ebé la'o tarde, nune'e continua prejudica comunidade no movimentação *transportasi*. Tempo emergência significa katak necessidade urgente no precisa hatán lais, nune'e bele facilita movimentação hodi antecipa mós risco boot seluk ne'ebé sei mai, maibé, infelizmente, projeto emergência balu han tempo naruk to'o fulan lima ka neen, depois mak continua filafali. Ami hakarak hatene ninia causa ne'e iha-ne'ebé, será que burocracia mak naruk liu ka incapacidade em termos financeiro no material husi companhia sira?

Ami relembra katak quase 75% to'o 80% iha território tomak maka ita-nia população acesso ona ba energia elétrica. Ida-ne'e ita hotu tem que reconhece, louva, aprecia no agradece ba Excelência Primeiro-Ministro, Xanana Gusmão, ho Partido CNRT ninia governação iha altura ne'ebá, maibé ita mós labele taka matan, ibun, fuan no sentimento ba falhanço sira ne'ebé dificulta ita-nia população sira.

Ami observa no identifica falta, lacuna balu ne'ebé hakarak apresenta ba instituições relevantes, hodi rona, haree no hadi'a.

Iha impacto barak mak afeta ba perturbação, ita sempre rona impacto rua ka tolu ne'ebé sai razão ba EDTL, mak hanesan: anin, udan, transformador avaria, *sekring cut out* kotu. Razões hirak-ne'e la convence ami, tanba ne'e ami hakarak hatene fukun loloos husi falhanço hirak-ne'e iha-ne'ebé.

Bancada KHUNTO nia preocupação no perguntas mak ne'e:

Ida, será que Ita-Boot sira la iha alternativa ka soluções técnicas seluk hodi bele antecipa ka resolve imediatamente quando tempo baila'ok ka udan maka'as?;

Rua, componentes materiais hanesan *sekring cutout* no sira seluk ne'ebé biban hirak-ne'e ita usa hetan teste iha laboratório qualificado ka lae?;

Tolu, desculpa, hamosu ami-nia dúvida, karik material sira fornece ne'e maka la iha qualidade? Ka loos duni hanesan ema político balu argumenta, katak ema mak halo sabotagem? Ka precisa tan formação ba recurso EDTL, E.P. nian?

Bancada KHUNTO mós lamenta ho estrutura Governo ne'ebé bokur demais. Iha ona Secretário Estado Eletricidade, Bee no Saneamento nian, maibé tanbasá mak harii tan instituição empresa pública rua kedas, maka EDTL, E.P. no Bee Timor-Leste, E.P.?

Precisa ita compreende, katak quando estrutura governamental ne'e bokur demais, ninia impacto negativo oferece prejuízo, perda ka hamosu *kerugian* ba osan povo nian ka lae.

Na qualidade hanesan Deputado, ha'u sugere ba IX Governo Constitucional atu taka tiha EDTL, E.P. no Bee Timor-Leste, E.P. atu nune'e atribui competência tomak ba secretaria Estado refere.

Tuka bá ne'e Bancada KHUNTO nia declaração política ohin loron, 13 de janeiro 2025.

Atu hakotu declaração política ohin loron, lori Bancada KHUNTO nia naran, hakarak hatu'o boas-vindas tinan 2025 ba povo Timor-Leste tomak, especialmente ba quadros no militantes Partido KHUNTO, hodi nafatin cria domin no paz iha ita Rain; Firme, consolida nafatin instrumento KHUNTO hodi nafatin tau esperança ba timoroan tomak atu participa iha processo desenvolvimento Estado de direito democrático, ho visão serbí Nação, ho nia base identidade «Fé, esperança no caridade», nune'e mós nia doutrina «Domin, moris-di'ak no justiça», ho nia objetivo fundamental atu «Tane ó rai, tane ó emar no tane ó lisan».

Muito obrigado, Sr.<sup>a</sup> Presidente.

Sr.<sup>a</sup> **Presidente**: — De seguida ha'u fó kedas tempo ba Bancada do PD.

Sr. **António da Conceição «Kaloan»** (PD): — Muito obrigado, Sr.<sup>a</sup> Presidente.

«Excelência Presidente Parlamento Nacional e membros da Mesa, Excelência Vice-Ministro dos Assuntos Parlamentares, ilustres Deputadas no Deputados, “Kaer metin ukun rasik-an, harii Nação husi base”.

Iha semana kotuk ita hotu assiste desmobilização população ne'ebé hela iha mota no população ne'ebé hela iha estrada-ibun sira-nia uma husi Secretaria de Estado dos Assuntos da Toponímia e da Organização Urbana, acompanha husi Ministro da Obras Públicas.

Ato ne'e humanamente provoca reação husi ita, Deputados, sociedade civil no mós Na'i Presidente da República, hodi condena Secretário de Estado la iha sentimento humano tanba forçosamente hasai população iha tempo ne'ebé ita, nu'udar país católico, sei celebra hela Natal no Tinan Foun, no mós hasai população iha tempo ida-ne'ebé udan.

Ato ne'e iha impactos sociais, económicos boot ba população sira tanba lakon oportunidade ba sira-nia oan sira-nia continuidade atu escola no mós inan sira-ne'ebé ho bebê bele mós hetan moras tanba udan, anin no malirin.

Declaração Bancada nian haree liu ba impacto social no económico ne'ebé afeta população sira-nia moris.

Excelência Sr. Vice-Ministro no distintas Deputadas no distintos Deputados,

Molok atu haree problema social no económico ne'ebé afeta população sira, hodi mós halo justiça ba povo kbiit-laek sira ne'ebé foin hetan evicção iha Fomento, no mós balu uluk iha Tasi-Tolu, ami koko alista mós fatin balu ne'ebé classifica nu'udar espaço público hodi bolu Governo nia atenção ba objetivo ordena cidade Díli.

Primeiro, iha zona Farol, besik ba Igreja Motael, concretamente iha Jardim 5 de Maio nia sorin, iha população lubun ne'ebé ocupa hela uma tempo português nian. Ocupação fatin ne'e estraga imagem

cidade nian tanba sira balu hariis iha estrada-ninin, fase hena no habai hena iha loos jardim laran, hodi estraga panorama jardim nian no mós perturba passageiros no viajante sira ne'ebe liu iha área ne'ebá. Fatin ne'e besik loos ba Porto Díli ne'ebé turista sira, bainhira tun husi ró, primeira vista ne'ebé sira hetan kona-ba Timor mak sira ne'ebé hela iha-ne'ebá nia modo moris.

Segundo, Bebonuk, hahú husi fatin ne'ebé Governo halo lançamento projeto fibra ótica, iha-ne'ebá mós população sira halo uma iha estrada sorin-sorin no balu halo uma besik loos iha tasi-ibun, to'o balu mós halo casa de banho iha loos ona tasi-ibun. População sira-ne'ebé residentes iha-ne'ebá ameaçado bainhira tasi boot no sira mós hamosu daudaun problemas ambientais iha área refere.

Terceiro, ita mós rona katak Governo sei haluan estrada Kuluhun, Becora ba terminal.

Quarto, ita ladauk rona se Governo iha mós plano atu hasai ocupante sira ne'ebé hela besik iha mota-ibun Ai-Tarak laran besik Palácio Presidente, tanba ne'e mós espaço público no besik ba edifício importante ida Nação nian, maka Palácio Presidente.

Ne'e mak fatin balu ne'ebé ami mós identifica, ne'ebé Governo karik sei halo hodi mós fó justiça ba nia povo seluk ne'ebé hetan ona evicção. Maibé, evicção sira hanesan ne'e labele sai programa de emergência, ne'ebé membro Governo ida atua mesak, mas precisa ação coordenada hodi envolve ministérios relevantes atu hamutuk fó apoio ba população sira, tanba mudança ne'ebé halo fó impacto social boot ne'ebé afeta ba comunidade sira-nia moris.

Secretaria de Estado ne'e parece harii iha IX Governo la'ós atu hala'o de'it serbisu sobu no baku rahun uma no mós duni população, mas precisa mós atu haree política de ordenamento da cidade ida oinsá, ne'ebe precisa hatuur iha plano ida ba desenvolvimento áreas urbanas iha território Timor-Leste.

Excelências,

Tuirmai ami mós hakarak alista impactos sociais ne'ebé afeta povo sira husi ação evicção ne'e.

Primeiro, povo lakon hela-fatin ne'ebé sira iha ona hodi hetan todan hasoru sira-nia moris;

Segundo, continuidade vida povo sira-ne'e nian ho incertezas tanba la hatene se sira tem que ba foho eh aluga fatin iha Díli tanba sira precisa halo sira-nia atividade de negócio nu'udar meios atu hamoris sira-nia família no mós contribui ba futuro Nação nian liuhosi haruka sira-nia oan ba escola.

Terceiro, continuidade escola ba labarik sira sai problema, tanba sira tem que husik sira-nia escola ida uluk hodi bá buka fali escola seluk. Sira ne'ebé karik besik finalista iha tinan oin tem que mós halo opção atu moris mesak iha Díli iha fatin foun, hodi continua escola ou sira tama ba grupo *drop out*, tanba la hatene atu bá continua iha-ne'ebé.

Quarto, inan sira ne'ebé hola responsabilidade mesak iha uma-kain tem que hasoru desafio boot atu hetan fali hela-fatin ida no precisa subar sira-nia sentimento nu'udar ema nian hodi bele bá husu caridade ba ema seluk atu fó espaço ba sira hela tanba sira hahú moris nu'udar família iha Díli.

Ne'e problema social balu ne'ebé evicção ne'e causa ba povo ki'ik sira-nia moris, tanba população sira-ne'ebé hetan evicção mai husi foho, no sira-nia presença iha Díli la'ós atu mai goza moris iha cidade, maibé mai haknauk moris iha Díli. Ita hotu hatene razão tanbasá mak ohin loron número população Díli aumenta ba beibeik.

Bancada PD preocupa se desmobilização ida-ne'e halo de'it ho intenção halo cidade sai furak no la halo mitigação ba impacto social ne'ebé população sira sofre.

Excelência Sr. Vice-Ministro,

Hodi minimiza aumento problemas boot iha ação sira iha futuro mak Bancada PD apresenta hanoin balu atu Governo considera hodi hala'o nafatin plano organização cidade Díli.

Primeiro, Bancada PD sugere atu Governo, molok continua nia plano sobu uma, muda população, precisa estabelece equipa conjunta ida hodi halo evicção no desmobilização ba população sira ho ação sira organizada no coordenada.

Bancada PD fó-hanoin ida-ne'e tanba IX Governo iha Vice-Primeiro-Ministro rua ne'ebé tutela ba áreas específicas, hanesan coordenador assuntos economia no mós coordenador assuntos sociais.

Segundo, Governo mós iha linhas ministeriais hanesan Estatal ne'ebé tutela ba autoridades municipais, iha proteção civil ne'ebé tau matan bainhira iha desastres, iha mós solidariedade social no inclusão ne'ebé exerce função social nian. Governo precisa estabelece equipa conjunta ne'e hodi ida-idak hala'o nia knaar bainhira sobu uma ka muda população husi fatin ida ba fatin seluk, inclui fila ba sira-nia municípios.

Bancada PD lamenta ho atuação recente tanba Governo la aprende husi situação sira ne'ebé liu tiha ona bainhira muda ema husi hela-fatin bá fatin foun. Bancada PD lamenta tebes ho função Obras Públicas nian iha evicção recente, hodi hatudu de'it Ministro nia poder lori escavador ba dudu no baku rahun povo ki'ik nia uma, enquanto que ordenamento cidade husik hela ema sira husi rai-li'ur mai halo construção temporária ho besi, hodi iha semana ida ka rua uma andar foun mosu nabanaban iha Díli.

Comércio ho SERVE lakon controlo hodi hala'o Lei Investimento, hodi regula investidor ho comerciantes ne'ebé mai halo venda de retalhos, hodi fó fatin ba dominação da cidade husi grupo foun ne'ebé hahú invade Nação ho naran *investor*.

Terceiro, Bancada PD propõe atu Governo hahú halo revisão ba plano estratégico hodi haree desenvolvimento iha nível município sira atu nune'e bele iha serviço no mós circulação osan iha município atu evita urbanização massiva no mós distribui desenvolvimento hodi fó mós benefício ba povo sira ne'ebé hela dook husi cidade.

Quarto, Bancada PD mós propõe atu iha evicção sira hanesan foin daudaun lori mós administradores municípios ka postos hodi hola responsabilidade lori sira-nia povo fila. Povo sira-ne'e, iha tempo eleição sira, buka rasik osan hodi ba exerce sira-nia direito cívico tuir eleição atu hili

partido sira. Iha tempo ne'ebé Governo hakarak halo desenvolvimento hodi dudu sees sira, precisa halo aproximação persuasiva hodi lori sira fila.

Quinto, precisa identifica sira-nia condição ho didi'ak, tanba uma-kain balu foun, ne'ebé bele mós sira la iha fatin iha foho. Ba situação sira hanesan ne'e, se Governo la iha plano ida-ne'ebé di'ak no integrado mak ita hahú hamosu classe social entre ita, hodi husik cidade ba la'o-rai sira ne'ebé iha osan, enquanto povo ki'ik ita dudu ba hodi hatodan tan sira-nia moris iha áreas remotas ne'ebé ita, nu'udar responsável ba desenvolvimento, ladauk lori progresso ba to'o fatin sira-ne'e.

Excelência Sr.<sup>a</sup> Presidente do Parlamento Nacional, Sr. Vice-Ministro em representação do Executivo, distintas no distintos Deputadas no Deputados,

Declaração Bancada nian ne'e halo hodi solidariza ba povo sira ne'ebé hetan evicção no lakon ona buat hotu, hodi mós sisi atu Governo labele demora liu selu indemnização atu povo kbiit-laek sira bele inicia fali sira-nia moris iha sira-nia fatin foun ne'ebé sira foin muda».

Mak ne'e de'it.

Obrigado.

Sr.<sup>a</sup> **Presidente**: — De seguida, ha'u fó kedas tempo ba Bancada do PLP.

Sr.<sup>a</sup> **Maria Angelina Lopes Sarmiento** (PLP): — «Excelência Presidente do Parlamento Nacional, Vice sira no composição da Mesa, distinto Deputado sira hotu, Excelência Vice-Ministro dos Assuntos Parlamentares no povo doben Timor-Leste.

Partido Libertação Popular iha convicção ida forte katak povo Timor-Leste mak tem que sai centro ba desenvolvimento nacional iha aspeto oioin, povo Timor-Leste mak tem que sai agente ne'ebé iha consciência no responsabilidade atu envolve iha desenvolvimento Timor-Leste. Significa, povo Timor-Leste mak tem que sai sujeito ba desenvolvimento, la'ós objeto husi desenvolvimento ne'e rasik, satán sai fali vítima ba desenvolvimento ne'e rasik.

Despejo forçado ne'ebé IX Governo Constitucional foin lailais hala'o iha Fomento II, iha Comoro, Díli, ne'ebé afeta 288 famílias ne'ebé hela iha área ne'ebá, obviamente halo sira sai nu'udar vítima ba desenvolvimento ne'e rasik.

Liuhosi declaração política ida-ne'e, PLP fortemente condena despejo forçado ne'ebé hatudu violação ba direitos humanos fundamentais, erosão ida maka'as iha Estado de direito democrático no traição ba aspiração povo Timor-Leste atu moris iha hakmatek, paz no harmonia, nune'e mós recua ida boot iha luta hasoru kiak hodi loke dalan ba futuro Timor-Leste ida-ne'ebé coeso, democrático no saudável.

1. Violação grave ba direitos humanos no traição ba direito oioin ne'ebé consagra ona iha Constituição RDTL.

Despejo forçado ba grupo sira vulnerável husi sira-nia hela-fatin constitui violação ida séria ba direito humano básico. Ema ida-idak iha direito ba habitação ne'ebé adequada hanesan haktuir iha direito internacional oioin, nune'e mós Constituição RDTL. Hodi hasai povo husi sira-nia uma lahó compensação ne'ebé própria ka habitação alternativa, Governo ida-ne'e falha ona atu garante direito sira-ne'e, nune'e troça confiança no esperança ne'ebé povo deposita iha sira.

2. Erosão ida maka'as ba princípio Estado de direito democrático hodi loke dalan ba estabelecimento tirania iha Timor-Leste.

Iha sociedade ida-ne'ebé democrático hanesan Timor-Leste, ne'ebé uluk luta maka'as hodi conquista democracia ne'e, direito no voz husi povo merece hetan respeito no proteção.

Despejo forçado manifesta partida ida dook husi princípio sira-ne'e, hodi comete iha negação ba vontade, sacrifício no moris-di'ak husi povo sira ne'ebé afetado. Além de ida-ne'e, troça ida ba sira ne'ebé sei hela iha Ponte CPLP nia okos atu transporta sira bá sede partido oposição, ida-ne'e hanesan intimidação ida ne'ebé labele hetan fatin iha sistema democracia ne'ebé funcional.

Lori força militar no polícia iha despejo forçado ne'e mós sai nu'udar evidência ida katak Governo ida-ne'e hahú cria fini tirania iha Timor-Leste, nune'e buka atu sobu sistema democrático iha Nação ida-ne'e.

3. Recua ida maka'as iha luta hasoru kiak.

Timor-Leste continua enfrenta desafio oioin iha luta contra pobreza tanba 42% husi população mak sei moris iha linha pobreza nacional nia okos, nune'e população carenciada ne'e sei luta maka'as hodi sustenta sira-nia necessidades ba ai-han, hatais no hela-fatin. Despejo forçado agrava tan uma-kain atus ba atus sai *homeless* no vulnerável liután. Em vez de alivia pobreza ne'e ho apoia comunidade sira ne'ebé marginalizada, atuação husi SEATOU ida-ne'e dudu sira tama liután ba iha destituição hodi nune'e nega tiha esforço oioin ne'ebé halo ona hodi luta contra pobreza. Governo ida-ne'e promete atu reduz taxa pobreza iha Timor-Leste durante tinan ninia ukun ba iha 10%.

4. Falha atu cumpre Pacto Internacional dos Direitos Económicos, Sociais e Culturais ne'ebé Timor-Leste adota iha 2002.

Ita adota convenção no pacto internacional barak, inclui direito económico, social no cultural, maibé ita falha atu compreende articula no implementa iha serbisu nu'udar ita-nia lei ida.

Tanba ita adota ona pacto ida-ne'e, tuir padrão *United Nations Housing Rights*, atu halo despejo administrativo ida, iha nia fase sira ne'ebé ita tem que cumpre, antes, durante no depois, maibé Governo falha totalmente husi fase sira-ne'e hotu.

Fase início mak halo identificação ba alvo despejo administrativo. Ida-ne'e SEATOU fó de'it aviso ne'ebé halo iha setembro 2024. Halo «inventarização» ba sasán sira ne'ebé iha possibilidade sei hetan estragos, ida-ne'e SEATOU ho Obras Públicas halo iha setembro 2024. Providencia ona fatin alternativo ba sira, ida-ne'e SEATOU la halo desde setembro to'o agora. Fatin alternativa sira tem que

iha bee moos, eletricidade, higiene no «sanitação», escola, acesso ba hahán, alocação ba rai no sítio, ida-ne'e Governo falha atu halo to'o agora.

Iha fase durante nian, tempo hala'o evicção, evicção labele hala'o durante tempo udan ou iha kalan, ou iha período ne'ebé ema na'in la marca presença iha oin, ida-ne'e falha totalmente tanba halo iha dia 2 de janeiro, tempo udan. Aat liután, família balu sei bá foho hodi festeja Tinan Foun iha foho, sira-nia uma rahun tiha ona.

Evicção labele estraga hotu sira-nia sasán sira no fó tempo ba sira atu arruma no salva sira-nia sasán, SEATOU falha halo tanba uma-na'in sei arruma nia sasán sira, balu até sei iha uma okos, máquina tama suru daudaun ona. Evicção labele hala'o ho ameaça ba vítima sira-nia vida. Ameaça no pressão halo malorek husi SEATOU iha campo, usa aparelho Estado hodi ameaça comunidade afetado sira labele ko'alia no sira iha situação pressão nia laran.

No fase ikusliu, ne'ebé crucial, mak tem que monitora no relata fali característica husi recolocação ba fatin foun. Ida-ne'e falha totalmente tanba hasai tiha ema, husik ema toba iha lona okos, ponte okos, ai-hun okos, bebê sira fulan rua to'o sia, inan isin-rua sira la iha haris-fatin atu hariis, te'in, toba, balu desmaia bá baixa iha hospital tanba haree ho matan máquina suru sira-nia uma, ne'ebé ha'u rasik tun no haree fatin sira-ne'e ho matan, no la iha plano atu evacua comunidade afetada sira bá fatin seguro, hanesan uma mahon temporário. Halo evicção ba ema iha dia 2 de janeiro ha'u rasik critica no levanta iha Plenária ida-ne'e hodi exige assegura comunidade sira bá fatin quarentena Tasi-Tolu, iha quarta-feira lokraik dia 8, ha'u bá haree ho matan no debate uitoan ho Sr. SEATOU, katak infelizmente, liutiha loron neen, hafoin iha quarta-feira lokraik dia 8 mak foin nakdedar lufلافu tula população sira bá Tasi-Tolu. Maibé, sira toba kalan ida de'it, dia seguinte lori kedas comunidade bá sira ida-idak nia município. Ida-ne'e factos, ha'u rasik tun haree.

Nune'e conclusão katak husi fase tolu no etapa ualu ne'e, Governo só bele cumpre de'it etapa rua, falha total husi etapa neen ne'ebé ha'u fó-sai. SEATOU la compreende Lei ECOSOC (*The Economic and Social Council*) ne'ebé adota, la compreende kona-ba fase-fase sira ne'ebé Estado precisa cumpre antes hala'o evicção, no iha indícios boot ba violação direitos humanos iha processo hirak ne'e.

5. Despejo nu'udar desvio ida maka'as husi assunto crítico ne'ebé Timor-Leste ohin loron enfrenta.

Governo ida-ne'e tem que halo despejo forçado, hodi nune'e desvia povo nia atenção husi questão sira urgente: hanesan falta ai-moruk, política necrofilia ka ódio moris ne'ebé Ministra Saúde implementa, qualidade baixa educação nian ne'ebé compromete futuro Timor-Leste, folin foos ne'ebé hetok aas, ne'ebé hatudu Governo nia incapacidade atu assegura segurança alimentar, cântico tuan «kadoras mai Timor-Leste» ne'ebé hetok do'ok husi Timor-Leste no seluk-seluk tan, hodi lança despejo forçado iha fatin oioin.

Governo ida-ne'e koko taka corrupção sistemática ho naran adjudicação direta, nune'e lori Timor-Leste ba rai-naruk, insegurança financeira, ne'ebé Timor-Leste sei hasoru iha década ida-ne'e nia

laran. Governo ida-ne'e sistematicamente hala'o ida-ne'e hodi lori Timor-Leste no povo ida-ne'e ba kotuk, atu nune'e depende nafatin ba dirigente sira husi Governo ida-ne'e nu'udar salvador hodi taka sira-nia falta, empatia no responsabiliza'ão iha âmbito democrático.

PLP (Partido da Libertação Popular) haree katak despejo forçado ne'ebé hala'o iha Timor-Leste sai nu'udar exemplo marcante ida katak Governo ida-ne'e susar atu respeita direito humano, falha luta contra pobreza no enfraquece Estado direito democrático.

Atu taka, ami reitera iha-ne'e katak ami la contra iniciativa Governo nian atu halo ordenamento cidade Díli, atu ita hotu hatudu capital cidade nia moos...

*Hakilar husi Bancada CNRT.*

... maibé, ida-ne'ebé ami la concorda ne'e mak ato despejo administrativo sira la halo tuir padrão internacional sira, ne'ebé ita adota ona, liuliu pacto internacional ba direito económico social no cultural, nu'udar ita-nia lei ida, hodi cumpre no halo cumpre. Governo Ida-ne'e falha totalmente, atu hakonu população sira-nia direito básico tuir Constituição haruka».

Obrigada barak.

Sr.<sup>a</sup> **Presidente:** — De seguida, distintos Deputados.

*Barulho husi Deputado sira.*

... agora ita tama ba intervenções diversas dos Srs. Deputados.

Iha pedido ponto de ordem, Deputada Olinda Guterres.

Um minuto!

Sr.<sup>a</sup> **Olinda Guterres** (KHUNTO): — Bom dia ba Sr.<sup>a</sup> Presidente Parlamento Nacional, Vice-Presidentes, colegas Deputados, Sr. Vice-Ministro dos Assuntos Parlamentares.

Ita Deputado sira iha-ne'e 65, foin daudauk ne'e, se la sala, hotu-hotu halo mensagem ba malu dehan katak Na'i Jesus lori dame mai, lori paz mai. Paz mak ida-ne'e? Ne'e la'ós dehan Jesus lori mai... Herodes, quando prega Jesus, nia liman sa'e no ain tun. Herodes quando prega ita, ita sira-ne'e, ne'e ita-nia ain mak sa'e, ita-nia ulun tun, ne'e duni labele critica malu, ne'ebé sala ita halo loos de'it.

Ha'u dala barak hatete: «tuur hamutuk bá!», liuliu ba Bancada rua ne'e, FRETILIN ho CRNT, tuur hamutuk ko'alia to'ok ba malu. Agora, mai critica ba critica, orsida dehan ida ne'e la di'ak, ida-ne'e la di'ak. Be uluk ita sira ukun ne'e mós hanesan hotu de'it...



Sr.<sup>a</sup> **Presidente**: — Muito obrigada, Sr.<sup>a</sup> Deputada, ponto de ordem um minuto.

*Barulho husi Deputado sira husi FRETILIN.*

Sr.<sup>a</sup> **Olinda Guterres** (KHUNTO): — Hee, ó ema ko'alia mós la di'ak.

Sr.<sup>a</sup> **Presidente**: — Distintos Deputados... bele taka tiha microfone! Ha'u agradece, lalika discute malu.

*Barulho husi Deputado FRETILIN.*

Ha'u agradece, orsida sei iha tempo ba ko'alia.

Ne'ebe ita tama kedas ba intervenções diversas dos Srs. Deputados.

Ha'u hahú kedas ho Sr. Deputado Leandro Lobato.

Sr. **Leandro Lobato** (CNRT): — Obrigado, Presidente.

Bom dia, Presidente, composição da Mesa, caros distintos Deputados e Deputadas, povo do ben Timor-Leste, Sr. Vice-Ministro dos Assuntos Parlamentares.

Presidente, aproveita oportunidade ida-ne'e, primeiro, atu continua halo apreciação ba PNTL (Polícia Nacional de Timor-Leste) e F-FDTL (FALINTIL-Força de Defesa de Timor-Leste) ba sira-nia prestação serviço hodi garante paz e estabilidade, atu nune'e ita bele celebra Natal ho Tinan Foun ne'ebé la'o ho di'ak, tanba ne'e mak precisa ita-nia apreciação ba sira-nia serviço. E, especialmente aprecia PNTL Município Liquiçá ho força destacado F-FDTL, ne'ebé iha cooperação di'ak tebes ho população sira, veterano sira, hodi celebra Natal ho Tinan Foun, e nune'e mós celebra loron 31 ne'ebé ita-nia herói boot saudoso Nicolau Lobato mate, iha tinan 1978.

Segundo, atu clarifica – pedido ne'e mai husi Sr. Rai Los – ba Sr.<sup>a</sup> Deputada Lúcia Norberta liga ho declaração iha semana kotuk katak Sr. Rai Los apodera rai sira iha parte Maumeta nian, hodi halo ninia atividade particular iha-ne'ebá, tuir informação sira-ne'ebé ha'u mós hetan, katak lae, nia la apodera rai iha-ne'ebá. Rai sira-ne'ebé nia ocupa, se Sr.<sup>a</sup> Deputada hakarak confirma, bele bá DNTP (Direção Nacional de Terras e Propriedades), nia halo contrato e nia arrenda ba Estado, nia la apodera rai ida iha-ne'ebá. E nia hatete, hanesan timoroan, karik halo investimento, ha'u hanoin, precisa ita hotu-hotu nia apoio karik, do que ita fó espaço ba empresário internacional sira ocupa rai sira e depois hodi fa'an de'it modo-tahan sira, então nia mós bele iha fatin atu halo investimento. Nia sente hanesan ataque ida que la iha fatos ba nia, liga ho apoderamento rai ne'ebé Sr.<sup>a</sup> Deputada temi.

Depois, anualmente nia selu ba Estado por volta de 10 000 USD ba rai, e nia hato'o katak comparación atu selu taxa ne'e pode ser que iha Liquiçá de'it nia mak bele selu ba Estado ho número ida-ne'ebé nia hatete. Depois, empresa sira-ne'ebé nia harii emprega timoroan, ema local, por volta 100 pessoas iha-ne'ebá, então, ha'u hanoin katak ita mós tem que ser aprecia ba ida-ne'e.

E depois, liga mós ho informação ne'ebé Sr.<sup>a</sup> Deputada dehan, «Sr. Germano se halo de'it evicção iha Díli, nu'usá la ba muda Rai Los iha-ne'ebá?» Depois, «Keta haree tan ba partido tanba mai husi grupo ne'ebé hanesan», ha'u bele halo comparación ida-ne'e katak ne'e interpretação ida-idak nian, mas política evicção ne'e, ha'u hanoin, la tau cor partido iha-ne'ebá, la tau cor grupo iha-ne'ebá. Se ita bele haree di'ak liu, evicção daudauk ne'ebé halo ne'e, ha'u hanoin, adeptos ka militantes CNRT nian barak mak sofre, la haree katak tem que ser halo de'it ba partido ida-ne'e, partido ida-ne'ebá, mas cumpre nafatin norma ka regra sira-ne'ebé bele guia Secretário de Estado ne'e.

Terceiro, atu aproveita oportunidade ida-ne'e husu plano construção estrada urbana sira, liuliu iha município, ita labele concentra de'it iha Díli, maibé di'ak liu haree ba município, tanba município sira mós precisa construção estradas urbanas no água urbana.

Mak ne'e de'it, Presidente.

Obrigado.

Sr.<sup>a</sup> **Presidente**: — De seguida, Sr.<sup>a</sup> Deputada Cedelízia Faria dos Santos.

Sr.<sup>a</sup> **Cedelízia Faria dos Santos** (CNRT): — Muito obrigada, Presidente.

Ha'u-nia bom dia no respeito ba Ita-Boot, composição de Mesa, Excelência Vice-Ministro dos Assuntos Parlamentares, distintos Deputados, mídia no maluk rona-na'in ne'ebé sintoniza Rádio Parlamento Nacional, dala ida tan ha'u-nia bom dia ba ita hotu.

Uluknanain ha'u hakarak hato'o ha'u-nia apreciação ba IX Governo Constitucional, liuhusi Ministério das Finanças, ne'ebé tau ona consideração ba parecer husi Comissão C, hodi aprova ona decreto do Governo tuir tempo, distribui ona pacote fiscal ba linha ministerial sira hotu no sistema financeiro sira hanesan *free balance* no portal transparência, ami haree ativo hotu ona. Ne'ebe ami fó parabéns ba ida-ne'e.

Tuirmai ha'u mós hakarak hato'o ha'u-nia apreciação ba Excelência Primeiro-Ministro ne'ebé lança ona fatuk dahuluk ba construção Irrigação Maliana II iha Suco Memo, Município Bobonaro, ne'ebé ho rai total 1100 ha, ho ninia duração tinan rua ho balun iha Município Bobonaro. Ita fiar katak depois de projeto ne'e remata, Município Bobonaro ajuda ona ba diminui importação foos husi rai-li'ur.

E tuirmai, preocupação sira-ne'ebé maioria Deputado sira foti iha Plenária ida-ne'e kona-ba ita-nia oan sira, labarik sira-ne'ebé fa'an sasan iha estrada ninin, ha'u haree katak iha Timor Plaza nia oin

ne'e, labarik sira-ne'ebé fa'an sasan começa aumenta liután, iha Meimart Fatuhada labarik sira barak loos. Durante tempo Natal ho Tinan Foun, ita haree labarik sira barak mak fa'an ahi-oan ne'ebé lakan-lakan iha estrada, ne'e barak loos tiha ona, Excelência Vice-Ministro.

Ha'u hanoin, IX Governo ida-ne'e, favor ita serbisu para diminui ou, se bele, halakon ona labarik sira fa'an sasan iha estrada ne'e. Ha'u preocupa tebetebes, ne'ebe se bele karik linha ministerial sira ou Ministério da Solidariedade Social mak foti de'it responsabilidade ba ida-ne'e ona, tanba ita tau tiha INDDICA (Instituto Nacional para a Defesa dos Direitos da Criança) ne'e iha-ne'ebá, maibé ha'u la hatene sira-nia serbisu ne'e saida de'it, sira la preocupa. Karik instituição ida independente harii tiha mak la halo ninia serbisu ne'e ita bele fó filafali ba ministério sira seluk para toma responsabilidade. Tanba ne'e ameaça ba futuro ita-nia oan sira-nian, então, ha'u husu ba Excelência Vice-Ministro, tau hela consideração ba ida-ne'e.

Ha'u-nia preocupação ikus mak ha'u la concorda ho linguagem ne'ebé prega ba IX Governo Constitucional ho liafuan «irresponsabilidade», «trata povo liu animal», «ema balu atu sai anjo». Ha'u considera liafuan sira-ne'e fó-sai husi ema sira-ne'ebé la preocupa ba ninia povo nia moris no la preocupa ba desenvolvimento rai-laran. Tanbasá mak ha'u ko'alia hanesan ne'e? Tanba evicção sira-ne'ebé SEATOU realiza iha dia 3 ne'e tanba mosu udan boot iha dia 1 no dia 2, ne'ebé comunidade barak, ita acompanha hamutuk iha mídia ne'e, ninia sasan sira-ne'e mota lori hotu tiha ona ba tasi. E, la'ós razão ida-ne'e de'it...

#### *Protesto husi Bancada FRETILIN.*

... SEATOU informa ba sira. Ita-Boot sira haree letra sira-ne'ebé hakerek ona ho letra mean iha uma ne'e, hatete ona katak atu sai, maibé ita-nia preocupação mós mak ne'e, tanbasá mak ita-nia povo sira lakohi preocupa ba sira-nia segurança rasik?

E informação ne'ebé ami simu dehan, «VIII Governo halo ona indemnização ba povo sira iha mota-ibun ne'e, wainhira mosu inundaçáo iha dia 4 de abril de 2020», maibé tanbasá Ita-Boot sira la haruka sira sai? Tanba ta'uk atu lakon votos ka? Realidade lakon hela ne'e iha 2023. Agora, Governo ida-ne'e hakarak atu halo di'ak, ita bá ko'alia tun ko'alia sa'e.

Ha'u mós la concorda, desculpa, Distinto Deputado sira, Ita-Boot sira bá halo fiscalização ne'e papel Constituição fó ba ita, loos duni ita bá halo fiscalização, Governo mós iha nia papel para nia executa nia serbisu, ita bá ne'e labele ba istori malu fali ka. Ita-nia hahalok iha Plenária sira ita istori malu ne'e, ita bá comunidade mós ita istori malu fali iha-ne'ebá. Ita ba fó moral fali hanesan ita mak madre padre fali iha-ne'ebá...

#### *Protesto husi bancada oposição.*

... Ita ida-idak halo ninia papel, ita bá fiscaliza hotu, ita mai foti iha Plenária hanesan Ita-Boot sira foti ne'e mak loos, ne'e mak exemplo loloos, ita labele halo tun bá halo sa'e fali.

E, ha'u aprecia tebes ho comunidade sira agora tanba horisehik ha'u liu husi ne'ebá, entre ponte CPLP no Ponte Comoro III, comunidade sira começa sobu sira-nia uma, – favor ida Ita-Boot sira liu husi ne'ebá – sira sobu rasik ona sira-nia uma, tanba sira hakarak, considera buat ne'e ameaça ba sira-nia vida. Horisehik ha'u liu iha-ne'ebá, iha uma andar sira-ne'e sira hasai sira-nia sasan, sira começa sobu ona kaleen sira-ne'e. Sira agora começa coopera ho Governo, ida-ne'e ita aprecia ba ita-nia comunidade sira iha-ne'ebá.

Ne'ebe ikusliu ha'u hakarak dehan hanesan ne'e: declaração política sira-ne'e tarde tiha ona tanba ita-nia comunidade sira la hela tiha ona iha ponte okos, *Bahasa* karik dehan *kasian engkau terlambat*. Ne'ebe hotu-hotu bá tiha ona município, ha'u husu ba ita hotu atu continua fó fiar ba ita-nia Primeiro-Ministro, Maun Boot Kay Rala Xanana Gusmão, tanba ita hotu acompanha tinan barak ona, impossível nia atu estraga fali ninia povo sira. Saida mak nia halo ne'e di'ak, Ita-Boot sira sei acompanha. Ha'u hanoin, veterano sira hatene hela, buat ne'ebé nia ko'alia agora ne'e tinan ne'e ita haree, ita mak sei sente rasik, no *bahasa* karik dehan *menikmati* resultado.

Muito obrigada, Sr.<sup>a</sup> Presidente.

Sr.<sup>a</sup> **Presidente**: — Tuirmai, ha'u fó kedas tempo ba Sr. Deputado Manuel Henrique.

Sr. **Manuel Henrique Noronha** (PD): — Obrigado ba oportunidade ne'ebé fó mai ha'u.

Lou Presidente Parlamento Nacional mak ami respeita, composição da Mesa, Lou no Na'i Deputados, Vice-Ministro dos Assuntos Parlamentares, mídia no povo rona-na'in tomak mak ami respeita, bom dia.(59:45)

Liuhusi biban ida-ne'e hakarak hato'o preocupação balu iha Uma-Fukun, Parlamento, ida-ne'e. Ita halo comparação kona-ba ba hasa'e qualidade educação ida-ne'ebé di'ak, significa Estado, liuhusi Ministério Educação, tem que cria mecanismo no condição escola ne'ebé di'ak, liuliu haree ba qualidade nune'e mós tem que haree ba quantidade dos alunos.

Educação Município Manufahi durante ne'e hasoru hela problema cada ano letivo foun quando estudante sira remata husi escola 3.º ciclo ka *SMP (Sekolah Menengah Pertama)* no atu continua ba iha secundária.

Iha capital Município Manufahi iha de'it escola pública ida, ne'ebé cada tinan tem que simu alunos besik 1000 mak ba iha escola refere. Agora daudaun, total alunos hamutuk iha escola refere iha 1400 resin, ho razão ida-ne'e mak, iha tinan 2022, Educação Município Manufahi hamutuk ho diretor da escola no professor sira hola iniciativa ida hodi loke classe paralela iha fatin tolu atu nune'e bele minimiza quantidade alunos iha escola refere.

Classe paralela ne'ebé loke iha Município Manufahi, ida iha Posto Administrativo Turiscai, ne'e ho total alunos atus ida resin, classe paralela iha Suco Fahinehan ho total alunos besik atus ida, aluno sira-ne'e mai husi Suco Fahinehan rasik, Suco Bubususu, Ailalek, Aituha, Fatukilat no Orana, Posto Turiscai nia suco ida ne'ebé besik malu ho escola refere.

Classe paralela ida-ne'ebé loke iha Fahinehan atu evita de'it aluno ka labarik sira, quando udan boot, ultrapassa mota boot ida naran Mota Sohi, tanba, quando udan boot ona impacto boot ba labarik sira atu lori sira-nia bukae, no sira atu bá escola refere ne'e problema.

Classe paralela ida mós loke iha Suco Babulu ho total alunos besik atus haat. Aluno sira-ne'e mai husi suco ida-ne'ebé besik Suco Babulu, hanesan Suco Daisua, Suco Betano, Suco Letefoho balu ho Grotu balu nia aluno, nia oan, mak bá escola iha-ne'ebá, ne'e atus tolu resin. Escola refere escola *induk*, escola 1912, hasai osan ho total 10 900 hodi halo construção ba escola refere, escola ba classe paralela ida iha Suco Babulu ne'e. E depois, hasai mós osan 5 mil hodi sosa cadeira no mesa para facilita labarik sira escola iha-ne'ebá. Ne'e iniciativa husi escola *induk* 1912 mak hasai osan ho montante hanesan ne'e hodi halo construção ka reabilitação escola ida no mós sosa cadeira ho montante 5000 para facilita classe ida-ne'ebá, atu minimiza de'it escola ida husi escola pública 1912 ne'e. Maibé, Ministério da Educação, liuhosi educação Manufahi, hola medida, iha Posto Turiscai ne'e continua nafatin, iha Suco Fahinehan classe paralela ne'e taka, no mós iha Suco Babulu classe paralela ida ho total alunos 300 resin ne'e tem que taka. Ne'e problema boot ida.

Agora labarik sira-ne'e atu tau ba ne'ebé? Se lori bá hotu iha escola *induk* 1912, significa katak alunos tem que sa'e ba besik 2000. Agora, ita, quando tau hamutuk alunos ida hanesan ne'e, ita halo comparação ba qualidade alunos, ne'e problema ona tanba cada sala iha escola refere uitoan liu mak 60 *orang*. Agora, iha 70 alunos mak iha sala ida, e depois, iha sala ida mínimo mak 60, ita compara kona-ba qualidade alunos ne'e problema ona, tanba ida-ne'e mak iniciativa escola nian hodi loke tan classe paralela ba fatin tolu ne'e hodi minimiza estudante sira husi escola ida-ne'e para bele hasa'e netik qualidade aluno sira-nian iha escola refere, tanba, quando aluno sira bá escola, dala ruma labarik sira nakonu no professor sira la bele controla, tanba ne'e mak iniciativa ida-ne'e hodi loke tan classe paralela iha Manufahi. Maibé, ha'u haree katak problema ida-ne'e la'ós acontece de'it iha Manufahi, dala ruma iha município seluk mós bele acontece hotu, tanba ne'e maka husu ba Vice-Ministro atu hatu'o hela ba Ministério da Educação foti medida ida hodi atende labarik sira ho didi'ak.

Obrigado.

Sr.<sup>a</sup> **Presidente**: — Tuirmai, Sr. Deputado David Dias Ximenes.

Sr. **David Dias Ximenes «Mandati»** (FRETILIN): — Muito obrigado, Presidente.

Antes de ko'alia, ha'u apresenta ha'u-nia cumprimentos, saudações fraternais ba Ita-Boot sira hotu.

Ha'u atu dehan de'it katak ohin lora ita tuur iha fatin ida-ne'e nu'udar consequência husi ruin ho raan ninian, mai ita hotu hamutuk, hano in lisuk saida maka ohin lora ita atu encara! Ha'u la mai ataca, ha'u la mai persegue, ha'u mai apresenta de'it factos.

Tinan ida liubá ne'e, antes de hotu, ita hotu-hotu loloos hamnasa, fó boas festas, maibé ida-ne'e la acontece ba família balu.

Balu moras, bá to'o iha hospital – Ita-Boot sira bele karik halo pesquisa to'ok bá – to'o iha-ne'ebá tratamento ne'e tem que liuhosi observações. Observações ne'e liuhusi *USG (Ultrasonography)* ou então lui husi *CT Scan*, maibé atu hein de'it ba to'o iha observação, ema ne'e tem que toba iha fatin ida, moras hela, liutiha horas lima ka horas neen tan mak médico foin mai atu halo observação. Observação ida-ne'e la to'o tan cinco minutos, liuhusi *USG*, dehan katak ninia moras ne'e la'ós ida-ne'e, mas ida-ne'ebá fali. Aban dadeer-saan, ida seluk mai fali dehan, «Oh, moras ne'e la'ós ida-ne'e», ida-ne'ebá fali ona. Dehan katak lori bá *CT Scan*, *CT Scan* to'o ohin lora ita seidauk hatene resultado *CT Scan* nian, e ema ne'e mate to'o ohin lora ita seidauk hatene nia diagnóstico ne'e saida. Quando ami, família, bá ko'alia ho responsável sira iha hospital ninian, husu ba sira, «dehan loloos mai ami, *CT Scan* ne'e funciona ka lae? Ita hotu-hotu mate resto, ruin ho raan sei jura ita, ko'alia loloos mai!». Ha'u husu dala tolu ho testemunho tolu la responde katak *CT Scan* ne'e di'ak ka lae.

Ha'u husu ba supervisor, «*CT Scan* di'ak ka lae?», la responde, e, to'o ohin lora ita seidauk hatene diagnóstico saida e ema ne'e mate tiha ona. Promessa dehan katak atu investiga, la'o hela, e, ami consegue ko'alia ho Primeiro-Ministro, Primeiro-Ministro dehan, «tem que investiga», ne'e duni ami lalika temi naran barak iha-ne'e, ha'u convida de'it Ita-Boot sira, ita atu interioriza saida maka loos ita ko'alia loos, saida mak sala ita ko'alia sala. Ne'e la'ós dehan fali ita atu condena malu, lae! Maibé atu hadi'a situação ida-ne'e. Ne'ebe, ha'u hano in, ita hotu-hotu mesak timoroan, uitoan ou barak ita halo ba Rai ne'e, mai, ita halo saida maka ita bele, ita halo! No saida maka ita la bele, fó fali ba ema seluk atu halo!

Muito obrigado.

Sr.<sup>a</sup> **Presidente**: — De seguida, Sr.<sup>a</sup> Deputada Olinda Guterres.

Sr.<sup>a</sup> **Olinda Guterres** (KHUNTO): — Dala ida tan, ha'u-nia bom dia ba Ita-Boot, ba Ministro, colega Deputado sira, no mós ba jornalista sira-ne'ebé iha-ne'e no participantes.

Ha'u secunda Sr.<sup>a</sup> Deputada Presidente Comissão C nian ne'ebé ohin ko'alia, ninia intervenção ohin ha'u aprecia no secunda, no Sr. David Dias Ximenes ne'ebé foin daudauk ko'alia mós ha'u secunda. Tanba saida mak ohin lora sai hanesan ne'e.

Ha'u mós fó apoio ba Governo tanba lala'ok ne'ebé IX Governo agora la'o, lala'ok mós hanesan VIII Governo ne'ebé la'o, ha'u mak sei tuur hela ne'e.

Bainhira ita hakilar dehan katak «ita-nia ema sira namkari, haree ita-nia ema sira la iha fatin», ne'e lae! Ha'u mós tun ba haree. 2023 e 2024, ha'u rasik mak foti iha-ne'e, husu ba Governo, iha VIII Governo mós ha'u husu, comunica ba povo sira atu labele halo uma iha mota-ninin tanba horibaintolu mota lori fahi, lori ema tun bá mate hotu ona e labarik na'in-rua mós mate. Tanba ne'e, ho hanoín ida-ne'e, husu ba Governo, ministério competente, bele bá avisa ema sira-ne'e katak labele halo uma iha mota-ibun. Tanba ne'e ha'u fó apoio nafatin ba SEATOU, nia hala'o nia serbisu, la'ós nia mak obriga nia an, nia hala'o nia serbisu tanba selu *ganti rugi* mós sira selu tiha, avisa tiha ona.

E ha'u contente tanba horisehik ha'u liu mai, Sr. Presidente República, Ramos Horta, ninia uma mós iha besi ida tidin iha-ne'ebá e Sr. Ramos Horta mós pronto atu sai. Ida-ne'e hatudu katak Governo ne'e labele oho ema. Nia oho ema karik, iha 1975 e 1999 ne'e hotu-hotu bá Indonésia, ita iha-ne'e agora halo saida? Ne'ebe, labele critica demais! Sé mak ukun, ukun bá! Ita luta hamutuk para aban-bainrua 2028 ita halo bá mak ita ukun fali bá, la buat ida.

Hanesan mós Sr. David ohin ko'alia, buat loos mak ida-ne'e, saida mak loos ita ko'alia loos, saida mak la loos, tuur hamutuk resolve, oinsá mak ita-nia Nação ida-ne'e bele ba oin. Ita mai tuur iha-ne'e mak critica malu hela de'it, ita hatún malu hela de'it, halo nu'usá mak ita-nia Nação nia desenvolvimento bele la'o ba oin?

Foin daudaun udan tau, ha'u rasik, tanba la'o ba hospital, ha'u liuhusi Vila, la liuhusi Mercado Lama ne'ebá, haree fo'er no udan-been lori fo'er ne'e husi ne'ebé mai, trancado iha naran sá... ita ko'alia mak ida-ne'e, husu ba ministério competente atu despacha ema ne'ebé serbisu ida-ne'e, hodi bele halo moos cidade Díli. Quando ministério ida-ne'e mak la consegue hadi'a fatin ida-ne'e, troca tiha!

Sr. Primeiro-Ministro, ha'u husu, ministério ida-ne'ebé serbisu la loos, hasai! CNRT ne'e matenek barak iha laran, balu agora la'o hela iha li'ur ne'ebá. Quando sira lakohi hala'o serbisu, *ganti!* Troca! La'ós tau fali remodelação.

Sr. Xanana, rona mai! Ita-Boot hatene katak Ita-Boot nia ema matenek iha ne'ebé-ne'ebé Ita-Boot hatene. Quando nia la hatene serbisu, hasai! Hatama fali ida, do que Ita-Boot nia naran iha Parlamento ema halo fo'er. Ne'e ha'u mak husu. Ha'u lakohi para ko'alia nafatin dehan katak IX Governo serbisu la hatene, la'ós! VIII Governo, ha'u mak tuur ne'e, uluk ha'u bá hamutuk ho Ita-Boot sira, mai fali ha'u hamutuk ho FRETILIN, agora iha-ne'e ha'u hanesan *poros tengah*.

Bele ha'u nafatin KHUNTO maibé ha'u ko'alia claro, buat ne'ebé loos loos, buat ne'ebé la loos, la loos! Labele critica demais Xanana, ninia ema ne'ebé iha kotuk mak sala, bá *ganti!*

Sr. Primeiro-Ministro, ne'e Olinda mak husu, ema labele halo fo'er Ita-Boot nia naran. Ita-Boot hasai ema ne'ebé la hatene hala'o serbisu. Nia la compreende, Ita-Boot tau sira ba iha-ne'ebá mas sira mós la compreende saida mak sira atu halo, serbisu ida-ne'e, depois Ita-Boot nia naran mak fo'er. Ne'e ha'u apoia Sr. David Dias ninian.

Tanba ne'e ha'u hato'o ida-ne'e iha fatin ida-ne'e, tanba SEATOU hala'o nia serbisu no ita labela critica loroloron dehan SEATOU, SEATOU, SEATOU. SEATOU ne'e atu ba iha-ne'ebé? Nia serbisu mak ne'e, ne'ebe agora atu halo nu'úsá? SEATOU nia serbisu mak atu halo saida?

Ida tan fali, husu ba Administrador Cristo Rei, fo'er ne'ebé carreta camioneta rua bá fakar iha Fatuahi leten ne'e haruka ema ruma bá ra'ut tiha, haruka sira bá ra'ut tiha, tanba sa'e mai bou los fali iha-ne'ebá, Sr.<sup>a</sup> Presidente.

Ha'u hanoin, ida-ne'e de'it mak ha'u hakarak hato'o.

Obrigada.

Sr.<sup>a</sup> **Presidente**: — Molok atu hakat ba oin, iha pedido ponto de ordem.

Um minuto, Sr. Deputado Gabriel Soares.

Sr. **Gabriel Soares** (CNRT): — Obrigado, Presidente.

Ha'u tama mai tarde liu ona be ha'u regista mós la biban.

Bom dia ba ita, ba Excelência Sr. Vice-Ministro no colega sira hotu, continua nafatin bom Ano ba ita.

Excelência Presidente, Excelência Vice-Ministro, la'ós atu hatán ba colega ida rua maibé ha'u rona iha declaração bancada balu, hanesan PLP nian ho KHUNTO nian, ha'u hatete ba Bancada KHUNTO, favor boot ida ba IP (Instituto Público) sira, husu hela ha'u-nia colega ida tuur hela iha oin ne'e nia hatene, nia hatene kona-ba IP sira-ne'e.

Kona-ba fali saida ne'e.... ha'u fó-hatene ba Governo, SEATOU, favor atu identifica uma rihun haat ne'ebé halo iha *Covid* nia tempo iha Hera ne'e, bá identifica hela bá para oinsá ita-nia maluk sira balu la hetan fatin karik ita lori ba iha-ne'ebá, uma rihun haat. Ex-Ministro Salvador mai ko'alia iha-ne'e haruka tau osan, iha VIII Governo.

Ikusliu, hatete ba Sr.<sup>a</sup> Deputada ida ohin ko'alia kona-ba «kadoras, kadoras, kadoras» talvez temi dehan «ilusão», favor, tempo fim-de-semana tun liu ba Natarbora, Sr.<sup>a</sup> Deputada, tun liu bá ne'ebá para haree, agora iha-ne'ebá ema hamoos hela du'ut oan sira, halo hela limpeza oan sira iha-ne'ebá. Tun bá! Agora sira hamoos namanas hela.

Ikusliu, hatete ba Sr.<sup>a</sup> Deputada ida ohin ko'alia kona-ba kadoras, kadoras, kadoras, talvez temi dehan «ilusão», favor tempo fim-de-semana tun liu hela ba Natarbora hodi bá haree tanba agora ema sira sei hamoos hela du'ut sira iha-ne'ebá, namanas hela.

Obrigado.

Sr.<sup>a</sup> **Presidente**: — Obrigada.



Distintos Deputados, ha'u continua bolu Deputado sira, se bele, regista! Maibé, tanba temos aqui 23 Deputados, ha'u taka ona para fó tempo ba Ita-Boot sira. Amanhã ainda temos Plenário, ne'ebe sei iha tempo.

Tuirkedas, Sr.<sup>a</sup> Deputada Maria Gorumali Barreto.

Sr.<sup>a</sup> **Maria Gorumali Barreto** (CNRT): — Obrigada, Sr.<sup>a</sup> Presidente. (01:16:09)

Ha'u-nia bom dia no respeito ba Sr.<sup>a</sup> Presidente no mós composição da Mesa, distinto Deputado sira, ba Sr. Vice-Ministro dos Assuntos Parlamentares, audiência tomak no rona-na'in Rádio Parlamento Nacional iha território tomak.

Primeiro, ha'u-nia continuação bom Ano ba carro distinto Deputado sira hotu no mós ba povo doben Timor-Leste.

Tanba ohin dia 13 de janeiro, ha'u hanoin katak ita tama mai iha Plenária iha tinan 2025 ne'e ita mai ona ho hanoin foun, *issue* foun, maibé *issue* ne'e, maluk sira, sei nafatin hela de'it. Ha'u preocupa tebetebes ho *issue* ne'ebé maluk sira iha sorin foti ne'e.

Ha'u hakarak atu dehan katak ba assunto saúde, sim, assunto saúde, iha observação ne'ebé ami iha, katak quase que em geral la'o di'ak hela maski iha falhanço, maibé ida-ne'e la afeta maka'as ba paciente no mós família paciente sira-ne'ebé acesso ba saúde.

Ko'alia kona-ba declaração política ne'ebé balu ohin hato'o, ha'u triste tebes nu'udar membro iha Comissão F. Ha'u triste tanba ha'u-nia colega ida-ne'ebé ohin lê declaração política ne'e nia mai husi Comissão Saúde, Segurança Social e Igualdade de Género e hatene tebes situação ida-ne'e, mas talvez la tun bá halo fiscalização. Bainhira Comissão halo fiscalização urgentemente iha Hospital Nacional Guido Valadares, colega sira la bá ida, ami husi bancada Governo mak bá.

E, ha'u hakarak hato'o katak situação equipamentos, máquina *CT Scan* agora ho condição ne'ebé di'ak hela. Iha tempo fiscalização, ami hala'o visita iha-ne'ebá, máquina *CT Scan* ne'e, hanesan ita hotu hatene, *tali korio* de'it mak aat, maibé nia funciona nafatin, nia la'o nafatin halo *CT Scan* ba paciente sira-ne'ebé precisa. Então, *tali korio* ne'e hadi'a ona iha dia 30 de dezembro de 2024, e agora funciona normal, la'o nafatin. Agora, dehan katak «la bele lê resultado», resultado ne'e lê hela, só iha máquina *printing* ne'e mak la funciona tanba ho condição aat, então ida-ne'e mak sei processo hela. Maibé, resultado *CT Scan* doutor especialista sira-ne'ebé refere nia paciente bá halo *CT Scan*, sempre bá lê direta iha computador ne'ebé iha. Ne'e mak realidade ne'ebé la'o hela, mas dehan katak máquina la lê, ne'e significa katak paciente mak karik la iha moras duni tanba ne'e mak la iha resultado *CT Scan*, então doutor sira labele lê duni. Ida-ne'e mak situação ne'ebé iha.

Iha parte seluk, ha'u mós haree, observação, kona-ba situação iha Hospital Nacional Guido Valadares, liuliu *issue* ida-ne'ebé foin mosu, kona-ba halo *fashion show* iha-ne'ebá.

Ha'u la concorda e critica tebes decisão ida husi Hospital Nacional Guido Valadares, liuliu dirigente sira iha Hospital ne'ebá, ne'ebé foti decisão halo *fashion show*. Ne'e la'ós fatin atu halo *fashion show*, maibé fatin ida-ne'ebé atu concentra, atu haree ba ema moras sira iha hospital ne'ebá.

Mas, iha parte ida, sira-nia *fashion show* ne'e haree liu ba farda ba profissional saúde sira tuir ida-idak nia profissão ne'ebé iha. Recomendação ida-ne'e husi Comissão F, sugere para médico sira iha ninia farda ketak, parteira e enfermeira sira, ho nune'e público ka família paciente sira-ne'ebé bá visita hospital bele hatene kedas dehan ida-ne'e doutor, ida-ne'e parteira no seluk tan. Só que, sira-nia decisão halo fali *fashion show* iha hospital ne'e mak ita hotu la concorda, inclui ami, husi Comissão F, mós la aceita ho situação ida-ne'e.

Ba fali iha parte seluk, kona-ba evicção, ha'u recomenda ba Sr. Vice-Ministro, liuliu husu ba Ministério da Administração Estatal, atu fó orientação ba líder comunitário sira, liuliu ba chefe suco no chefe aldeia sira, atu controla sira-nia comunidade, área ne'ebé tama iha sira-nia suco no mós iha aldeia atu nune'e labele mosu harii uma iha fatin risco.

Ida-ne'e de'it mak ha'u hato'o.

Obrigada.

Sr.<sup>a</sup> **Presidente**: — Obrigada.

Distintos Deputados, iha pedido ponto de ordem iha-ne'e, mas ba sira-ne'ebé ohin intervenientes ba declaração política, ha'u sei fó intervenção ikus tanba temos aqui 22 Deputados, e ohin ha'u anuncia katak ha'u taka tiha ona.

Ita hakat kedas ba Sr. Deputado Luís Roberto.

*Iha tempo hanesan Sr. Deputado David Dias Ximenes mós husu ponto de ordem.*

Então di'ak, Ita-Boot, um minuto.

Sr. **David Dias Ximenes «Mandati»** (FRETILIN): — Muito obrigado, Presidente.

Ha'u la contradiz, maibé bele karik dia 30 mak cordão ka naransá *CT Scan* nian mai, e ema ne'e mate iha dia 23. Sé mak ko'alia? Ema iha-ne'ebá investiga hela, lalika ita iha-ne'e mak dehan di'ak ka la di'ak. Investigação la'o hela e Ita-Boot sira, ha'u dehan, iha moral uitoan para haree ema nia terus.

Muito obrigado, Presidente.

Sr.<sup>a</sup> **Presidente**: — De seguida, Sr. Deputado Luís Roberto.

Sr. **Luís Roberto da Silva** (KHUNTO): — Obrigado, Sr.<sup>a</sup> Presidente Parlamento Nacional.

Bom dia ba Ita-Boot, membro da Mesa tomak, Sr. Vice-Ministro dos Assuntos Parlamentares, colega Deputado no Deputada sira no povo doben Timor-Leste.

Primeiro, ha'u hakarak fó apreciação ba declaração política husi Bancada FRETILIN no PLP.

Declaração política ida-ne'e ha'u bele dehan katak atu desafia nafatin IX Governo atu hala'o serbisu administração ne'e ho di'ak liután, liuliu kona-ba evicção, halo atendimento ba ita-nia povo ne'ebé afetado husi evicção iha Fomento II. De vez em quando ita muda ita-nia comunidade sira-ne'e ita seidauk preparado didi'ak, depois muda, ha'u bele dehan katak mal administração. Tanba saida? Ita sobu tiha mak foin recolha dados, recolha número bancário husi comunidade sira. Ida-ne'e ha'u bele dehan katak mal administração husi IX Governo ida-ne'e.

Ita dehan boa governação bainhira iha tempo diálogo ne'e ita bele recolha ona dados ruma, fó ona compensação ba ita-nia comunidade sira, e, a'u fiar katak comunidade sira bele na'in sobu sira-nia uma, sira-nia hela-fatin para sasán sira-ne'ebé sei merece atu usa ne'e bele usa. Mas, ida-ne'e lae, sobu tiha mak foin halo plano, halo diálogo ho comunidade, foti conta bancária hodi halo compensação ba sira. Ida-ne'e mak, ha'u bele dehan, mal administração, ne'ebe ita precisa hadi'a mak ida-ne'e.

Segundo mak ha'u hakarak hatu'o mós ba Parlamento ida-ne'e katak intervenção husi Sr. Deputado David nian ne'e clara tebetebes, loos, ne'ebe ita labele taka buat ne'ebé loos ne'e. Maski ita tuur iha-ne'e nu'udar Deputado, mas de vez em quando ita-nia família balu mós iha-ne'ebá serbisu nu'udar doutor especialista, ne'ebe ita hatene muito bem. Buat ne'ebé aat, aat duni, ne'ebé afeta ba ema nia vida ne'e de vez em quando mate. Claro que sempre mate, maibé mate ida-ne'ebé la tuir nia dalan mós de vez em quando ita duvida ba ida-ne'e, ne'ebe ita precisa hadi'a mak buat sira-ne'e hotu.

Tuirmai mak ha'u hakarak ko'alia ba Sr. Vice-Ministro relaciona ho ita-nia Natal ho Tinan Foun ne'e, ita-nia comunidade sira-ne'e barak mak halo viagem ka passeio bá Bali ou estrangeiro, *ticket* avião ne'e karun demais, to'o 400 USD, tanba ida-ne'e mak ita-nia comunidade sira-ne'e balu sa'e *travel*, balu sa'e *bus* ne'ebé iha entre Kupang ho Timor-Leste. Hotu-hotu bá to'o iha Kupang mak foin sosa *ticket* iha-ne'ebá tanba barato, ne'ebe, mais ou menos, hanesan Ministro dos Transportes e Comunicação ne'e, ha'u hakarak husu to'ok esclarecimento husi Ita-Boot sira: mais ou menos *Citilink* ne'e ninia agente be fa'an *ticket* ne'e iha-ne'e iha duni ka lae? Depois halo comparação ba ninia folin ne'e. *Seolah-olah* ita considera Timor-Leste ne'e la'ós nação ida tanba agora bus mós husi Kupang Mai to'o Timor-Leste dehan *Bus Antar Kota* dan *Propinsi*. Ha'u considera Timor-Leste hanesan *propinsi* ida, ne'ebé ita-nia *ibu kota* ne'e iha fali Kupang.

Ne'ebe Timor-Leste ne'e comunidade ne'e, quando Tinan Foun ka Natal mak atu halo passeio bá Bali, hotu-hotu tem que bá descansa iha Kupang, iha Atambua, depois hola *ticket* iha-ne'ebá tanba barato, então economicamente, de vez em quando ita contribui bá iha-ne'ebá de'it, Timor-Leste ne'e sei hela ho zero de'it, hela ho percentagem oan sira-ne'e.

Karik Sr. Ministro dos Transportes la sente tanba de vez em quando sa'e avião bele gratuita karik, ita la hatene, maibé comunidade sira-ne'ebé atu sosa *ticket* ne'e karun demais, ne'ebe hadi'a mós administração ida-ne'ebá bá para tempo ruma ne'e avião sira-ne'ebé ita halo contrato ba ne'e, ninia agente be fa'an saida ne'e fó loloos iha-ne'e para claro iha-ne'e para ninia folin ne'e mós tem que hanesan bá para ita bele reduz buat ida ita-nia ema sira hotu-hotu halai ba Kupang ho Atambua mak foin continua ba Bali ka fatin ne'ebé sira prefere ba.

Ida-ne'e mak ha'u hakarak hato'o ba Sr. Vice-Ministro, se bele karik, hato'o hela ba ita-nia Ministro dos Transportes e Comunicação.

Obrigado.

Sr.<sup>a</sup> **Presidente**: — De seguida, Sr. Deputado Florentino Ximenes.

Sr. **Florentino Ximenes da Costa «Sinarai»** (FRETILIN): — Obrigado, Presidente.

Excelência Sr.<sup>a</sup> Presidente do Parlamento Nacional, distintos Deputados, Sr. Vice-Ministro dos Assuntos Parlamentares, mídia nacional, povo do Timor-Leste, camaradas Buibere no Maubere sira hotu, dadeer di'ak ba ita hotu.

Secunda declaração Bancada FRETILIN, PLP, KHUNTO no PD nian tanba realidade Secretário Estado SEATOU, Sr. Germano, sai duni *penjelmaan* lafaek, tanba ne'e mak iha início 2025 iha Timor-Leste acontece fenómeno oioin iha mandato XI Governo Constitucional, ne'ebé lidera husi Sr. Kay Rala Xanana Gusmão.

Fenómeno ida mak halo evicção ka despejo administrativo hodi sobu povo nia uma ho maneira oioin no la ho digno, Sr. Xanana husi kotuk fahe tan fali osan ba povo afetado sira no goza tan ita-nia povo sira hodi haruka sira bá hela iha BP7. Maneira ida-ne'e hatudu momoos Sr. Xanana halo *penghinaan*, ofende ita-nia povo ki'ik sira-ne'ebé sofre hela tanba incapacidade, desorganização husi IX Governo atual.

Hodi continua, ha'u secunda declaração Bancada FRETILIN nian hodi hatete, fenómeno ida seluk mak Ministra da Saúde, ne'ebé incapacidade, orienta funcionário iha Hospital Nacional Guido Valadares hodi realiza evento *fashion show* iha corredor hospital, fatin acesso ba ema halo movimento sai fali hanesan palco festa ninian. Inacreditável, tanba Ministra incapacidade ida-ne'e nem hakarak rona paciente sira-nia halerik ba sira-nia moras tanba de'it nia fó liu prioridade ba suku farda atu halo uniforme ba pessoal saúde iha Hospital Nacional Guido Valadares.

Fenómeno ida seluk tan mak funcionário husi Gestão de Mercado aproveita facilidade Estado hodi ba na'ok população nia mina-rai ne'ebé fa'an iha dalan-ninin, tula ba carreta no hodi halai. Wainhira vendedor mina-rai *post* hahalok na'ok-teen ida-ne'e iha mídia social, funcionário criminoso sira-ne'e

filafali bá ameaça ho modos humanismo. Husu ba autoridade PNTL atu haree ida-ne'e no halo investigação ida kle'an ba funcionário sira-ne'ebé comete crime hodi na'ok população nia mina-rai.

Husu mós ba PNTL atu halo investigação ba Diretor Gestão de Mercado relaciona ho nia declaração ba mídia katak foti população nia mina-rai masa ida ka rua ne'e la buat ida tanba questão humanismo mós. Husi nia declaração ida-ne'e hatudu momoos katak durante ba foti comunidade ka vendedor sira-nia sasán ne'e kala sira fahe ba malu de'it. Pior liu mak sira mós dehan, katak sasán sira foti ne'e hodi bá fó fali ba ema kbiit-laek sira. Tanba ne'e husu Diretor Gestão Mercado, di'ak liu mak cumpre de'it Ita-Boot nia serbisu, la precisa inventa fali Ita-Boot nia serbisu foun hodi bá haree kbiit-laek sira.

Fenómeno ida ikusliu mak ita hotu see tilun hela ba fronteira katak pessoal polícia ida nia oan lori kilat-musan tama sai iha fronteira. Husu ba PNSIC atu halo investigação ba ida-ne'e, porque kilat-musan no bala-musan ne'e ameaça ema nia vida quando ema civil mak kaer.

Obrigado, Presidente.

Sr.<sup>a</sup> **Presidente**: — De seguida, o Sr. Deputado Firmínio Taequi.

Sr. **Firmínio Taequi** (CNRT): — Obrigado, Presidente.

Bom dia ba Presidente, Vice-Presidente no composição da Mesa, Vice-Ministro dos Assuntos Parlamentares.

Ha'u iha assunto ida de'it, maibé, antes atu hato'o ha'u-nia assunto ne'e, ha'u fó parabéns e aprecia SEATOU ne'ebé iha hanoin di'ak hodi hadi'a cidade Díli. sira-ne'ebé hetan evicção ne'e hetan circular tinan ida antes, tinan 2023 ne'e sira simu ona informação atu hamamuk fatin. Aat liután, balu ne'ebé hetan indemnização lori fali osan ne'e bá halo tan uma iha mota-ninin, ne'ebe aparecia ba SEATOU nia serbisu.

Iha biban ida-ne'e mós hakarak fó parabéns no aprecia ba maluk luta-na'in sira, ne'ebé iha princípio nafatin, considera no reconhece nafatin e apoia nafatin política Maun Xanana nian.

Ha'u-nia assunto ida mak atu dirige ba Vice-Ministro dos Assuntos Parlamentares atu informa ba Ministro dos Negócios Estrangeiros liga ba problema iha fronteira, atu buka solução ba fronteira Sakato tanba fronteira Mota-Ain e Batugadé meio-dia taka horas ida de'it, maibé Sakato taka horas rua. Ne'ebe sira haree tuir ita-nian ne'e, ita loke tuku 9 – sira Sakato loke tuku 9 – taka tuku 12, ita conta horas tolu de'it. Maibé, iha Mota-Ain taka horas ida de'it, tuku 1 ba tuku 2, ne'ebe, husu atu buka solução lailais, atu taka ne'e tem que hanesan, Mota-Ain ou Batugadé tem que hanesan ho Sakato nian, selae ita urgente karik, ita husi Oe-Cusse mai ita hein horas rua kedas. Ne'ebe, ha'u husu ba Ministro atu informa ba Ministro dos Negócios Estrangeiros atu buka solução ba horas taka nian ne'e, tem que hanesan, Sakato nian ho fronteira Batugadé tem que hanesan.

Mais menos, ha'u-nia assunto mak ne'e de'it.

Obrigado barak, Presidente.

Sr.<sup>a</sup> **Presidente**: — De seguida, Sr. Deputado Antoninho Doutel Sarmento.

Sr. **Antoninho Doutel Sarmento** (FRETILIN): — Obrigado ba tempo.

Ha'u-nia respeito ba Ex.<sup>a</sup> Sr.<sup>a</sup> Presidente Parlamento, componente da Mesa, Vice-Presidente Parlamento, colega Deputado no Deputada sira, ba mídia, técnico, povo Maubere no Buibere, saudações revolucionárias!

**Sr. Deputado sira husi FRETILIN**: — Sempre revolucionárias!

Ha'u, em primeiro lugar, atu reforça ou secunda declaração sira husi Bancada FRETILIN nian no bancada tolu seluk ne'ebé mós declara preocupação social sira-ne'ebé sai problema boot iha ita-nia País horas ne'e daudaun.

Segundo, liga ba assunto Saúde, iha 24 dezembro ha'u bá mate-uma ida iha Rotutu, bainhira ha'u to'o iha matebian nia uma, nia katuas husu ba ha'u: «Hospital ne'e ema mate, atu fó hariis tem que selu ho 30 dólar no atu sona *formalin* ho 50 USD?» Ha'u precisa atu hetan explicação ida-ne'e. Tansá mak paciente ida mate, fó hariis no sona tem que selu?

No ha'u halo pergunta: «selu ne'e halo nu'usá, bá selu iha banco ka selu direita ba ema ne'ebé sona iha hospital?» Ne'e precisa hetan explicação ida ba quadro legal sira-ne'ebé atende situação sira hanesan ne'e, contraditório ka lae ho ita-nia Constituição, ida-ne'e tem que fó explicação ida di'ak.

Terceiro, paciente balu bá hospital buka atu hetan tratamento ida-ne'ebé ho condições di'ak, às vezes ita-nia ema sira piquete hospital hatete: «imi buka rasik carreta hodi bá halo tratamento iha Maubisse ka Díli!», ida-ne'e labelle acontece! Bainhira ba mate-uma ida, família husi matebian ne'e hatete sasán sira-ne'e. Tanba saúde iha problema duni iha ita-nia País, ita-nia território tomak, ne'e precisa hetan explicação ida di'ak.

Quarto, evicção ida-ne'ebé ita foti iha-ne'e iha dia 7 de janeiro de 2025, no quarta-feira ita tun ba haree iha terreno, ita bele hatete katak inundaçã sira-ne'ebé acontece mai por natureza, ita la debate. Maibé, inundaçã ida-ne'e mai fali ho atuação ema nian, halo ha'u iha pergunta: evicção ida-ne'e IX Governo ema na'in-tolu de'it ka? Secretário de Estado dos Assuntos da Toponímia e Organização Urbana (SEATOU), Primeiro-Ministro, Polícia ho FFDTL, tolu de'it mak bele halo serviço ida-ne'e. Sobu tiha, depois katuas Xanana mak ba hi'it fali ai tula ba carreta, buat sira-ne'e hotu. Serbisu saida mak ida-ne'e?

Dentro ida-ne'e mak dalan para ita atu kore povo husi problema social sira? Se SEATOU explica sasán iha 2024 ba kotuk katak «imi tem que sai!», ho de'it liafuan mamuk ida, ita iha osan, osan transferêcia pública iha cento e tal milhões. Tansá la haruka ona ba conta vítima sira-nian para sira bele halo ona uma alternativo ida para sira atubele hela, antes SEATOU lori sasán sira-ne'e bá? Bá harahun ema nia uma, até ema la consegue foti sasán sira husi ema nia uma, caderno, lapiseira, liuliu labarik sira, ha'u preocupa labarik sira-nia futuro.

Até iha dia 8, quando ita tun ba, labarik sira moras toba hela iha valeta. Saida mak ida-ne'e? Ministério da Solidariedade Social iha-ne'ebé? Saúde iha-ne'ebé? Ministério da Justiça iha-ne'ebé? Ou tem que SEATOU ho Primeiro-Ministro iha-ne'ebá de'it? Ou tem que iha força sira iha-ne'ebá para hamriik ho oin toos, halo ema book an la di'ak? Expressão livre ema nian tem que iha, labele hata'uk ema! Horibainhira mak Presidente da República hasai Estado de sítio atu hatun ema aguarda sasán sira-ne'e?

País democrático ho ninia desenvolvimento ne'e atu iha infraestrutura ida di'ak ho povo ida di'ak ne'e tem que iha diálogo no atuação ho humanismo. Ita labele ukun ho liman besi, ne'e labele! Ita tem que ukun ho diálogo, ho atuação ho humanismo, ho plano no programa ne'ebé ita define ona, katak dalan atu cidade mak ne'e no atu kore povo mak ida-ne'e.

E até ema sira-ne'ebé halo empréstimo iha Kaebauk, sira preocupa. Ita ba hasoru sira, «ami tem que halo nu'usá? Kaebauk nia regra ne'e ami tem que selu. La'ós tanba ema sobu ami-nia uma» Então, oinsá ho sira-nia problema sira-ne'e? Tanba ne'e, precisa hetan dalan ida-ne'ebé di'ak, ita labele atua sasán sira hanesan ne'e.

Quinto, infraestrutura iha município sira, ha'u aceita ho declaração sira-ne'ebé semana kotuk Viqueque foti.

Sr. Vice-Ministro, lançamento projeto ba projeto, mas ha'u tun ba, projeto sira-ne'e parado hela. Saida mak ne'e? Lança por lança, hatún ba mídia, mas, depois iha semana sira ba kotuk ita bá, projeto sira-ne'e barak parado. Ke'e hela valeta no husik atu sai tiha fali mota, mas fatuk ho rai-henek bou hela no nunca resolve, iha Iladiki dalan ba Vice-Ministro nia suco. Ita labele halo sasán sira hanesan ne'e!

Ha'u-nia intervenção sira husu atu Ministro das Obras Públicas fó relatório ida mai iha Mesa to'o agora la iha. Ne'e buat ida *broker* nia jogo mak halo hanesan ne'e, tanba quadro legal atu tau osan hira para halo infraestrutura ida-ne'e mós la justifica, mas ita lança iha mídia para ema haree katak Governo avança tebetebes ho projeto, mas ó tun ba, projeto sira-ne'e parado hela.

Ha'u hein explicação no continua hetan relatório di'ak husi Infraestrutura.

Obrigado.

Sr.<sup>a</sup> **Presidente**: — Distintos Deputados, horas marca 11h00, ita *break* lai, ita fila hikas 15 minutos no ita-nia continua ita-nia sessão plenária.

Muito obrigada.

*Horas hatudu tuku 11 loloos.*

Sr.<sup>a</sup> **Presidente**: — Sr. Deputado, tempo la’o daudauk, ha’u convida ho respeito ita hola fatin, selae ita lalika continua intervenções.

*Horas hatudu tuku 11 liu minuto 37.*

Quinze minutos ita estende to’o tuku hira?

Serbisu barak tebes que precisa ita-nia atenção, ne’ebe, dala ida tan, ita organiza malu. Se bancada do Governo bele mai iha-ne’e, tau tan PLP, ha’u hanoin, ita iha quórum. Ne’ebe, dala ida tan, ho respeito, ha’u husu para ita hola fatin.

Distinto Deputado, ita sei iha 13 Deputados para intervir. Ne’ebe, como Sr. Deputado Domingos Augusto iha-ne’e ona, ha’u bolu kedas.

Sr. Deputado Domingos Augusto, halo favor.

Sr. **Domingos Augusto «Deker»** (CNRT): — Obrigado ba oportunidade.

Ha’u-nia respeito ba Sua Excelência Presidente do Parlamento Nacional, componente da Mesa, ba distinto no distinta Deputado sira, Excelência Vice-Ministro dos Assuntos Parlamentares.

Molok atu hato’o ha’u-nia liafuan ruma, la haluha agradece ba Na’i Maromak ne’ebé fó nafatin oportunidade ba ita to’o iha tinan ida-ne’e, 2025, hakru’uk nafatin ba herói ho mártir sira-ne’ebé sempre acompanha ita iha processo hotu.

Desejo nafatin bom Ano ba ita, espera katak tinan foun ida-ne’e bele lori hanoin ne’ebé foun mai ita, representante povo, iha Uma-Fukun, Parlamento Nacional.

Primeiro, hakarak fó mós apreciação ba Comando F-FDTL ho PNTL ne’ebé bele hala’o ona sira-nia knaar ho didi’ak, hodi assegura ita iha celebração Natal 2024 ho Tinan Foun hodi simu 2025 iha âmbito tempo ida-ne’e.

Segundo, ha’u hakarak aproveita tempo ne’e, liuhosi Excelência Vice-Ministro dos Assuntos Parlamentares, atu hato’o ba Ministério das Obras Públicas, primeiro, ba direção EDTL katak eletricidade iha Posto Administração Atsabe, liuliu iha suco rua, Suco Lação ho Suco Obulo, mate permanente. Tinan kotukbá ha’u foti ona iha-ne’e, distinto Deputado Marcos mós foti, ho nia razão



mate ne'e to'o semana tomak, lakan fali loron ida ou lae la to'o loron ida tem que mate filafali to'o loron lima ou semana tomak.

Tuir informação ne'ebé ami acesso husi terreno, razão ne'ebé técnico iha posto administrativo ne'e apresenta mak fio ne'ebe instala iha-ne'ebá maka la iha qualidade, tanba ne'e mak eletricidade manas, hodi mate beibeik e mate to'o semana tomak, prejudica tebetebes sasán eletrónico povo nian iha-ne'ebá. Ne'ebe aproveita biban ne'e atu husu ba direção EDTL, bele karik, halo netik manutenção ki'ik balu ba fio ne'ebé sira preocupa nune'e ahi labele mate beibeik hodi prejudica, estraga povo nia sasán sira.

Terceiro, husu nafatin ba Direção Obras Públicas atu acelera processo construção de Estado baseia ba orçamento geral ne'ebé aprovado, espera katak buat hotu bele la'o di'ak. Liuliu, ha'u hakarak cita iha-ne'e, atu fó importância ba muro proteção ida iha Gleno, iha área Fatukero nian, muro proteção ne'e ba kota Gleno. Haree ba acontecimento iha semana kotuk ne'ebé ita hotu haree iha vídeo, *virai* tebes, mota lori hakoi tiha carreta rua, ne'ebe muro proteção ida área iha Fatukero ne'e importante tebes atu assegura cidade Gleno ne'e. Cidade Gleno iha direção barak iha-ne'ebá, edifício Estado, inclui Comando PNTL, edifício sede Conselho Veteranos e hanesan mós autoridade local Posto Administrativo Gleno nia edifício, edifício lubuk boot ida ne'ebé iha Gleno ne'e quase que ameaçado. Tanba ne'e husu ba Direção Obras Públicas, liuliu ba técnico sira, atu acelera processo ne'e, nune'e bele protege cidade klood ida-ne'e husi ameaça mota nian.

Ha'u hanoin, ba biban ne'e mak ne'e de'it.

Obrigado barak.

Sr.<sup>a</sup> **Presidente**: — De seguida, ha'u fó kedas tempo ba Sr.<sup>a</sup> Deputada Aliança da Conceição.

Sr.<sup>a</sup> **Aliança da Conceição Araújo** (CNRT): — Obrigada ba Presidente Parlamento Nacional.

Bom dia ba Ita-Boot ho composição da Mesa, ba colega Deputada e Deputado sira, ba Vice-Ministro dos Assuntos Parlamentares, ba ita hotu, assessor sira e técnico sira.

Em primeiro de tudo, continuação do bom Ano ho boas entradas ba IX Governo Constitucional no ita hotu.

Ida seluk, ha'u hakarak hatu'o mós parabéns no continuação de bom trabalho ba Excelência Secretário de Estado dos Assuntos da Toponímia e Organização Urbana, SEATOU, maski simu críticas barak, maibé continua hala'o serbisu tuir nia dalan no baseia ba lei.

Hakarak fó mós parabéns ba parte relevante sira seluk ne'ebé contribui, inclui ministério competente sira, hanesan Ministério do Interior, liuhossi proteção civil, oferece ona ai-han ba maluk sira ne'ebé hetan evicção, Ministério Solidariedade Social e Inclusão, ne'ebé fó apoio ba inan no labarik sira, no parte seluk-seluk tan ne'ebé contribui no hala'o duni sira-nia serbisu.

Quando Ita-Boot sira hatete katak IX Governo Constitucional abandona nia povo sira-ne'e, então sala! Tanba Governo hala'o nia serbisu no toma responsabilidade, lori ita-nia maluk sira bá quarentena Tasi-Tolu hodi resolve no garante katak ita-nia maluk sira bele desloca to'o sira-nia hela-fatin iha municípios. No, hanesan ita acompanha, SEATOU sei foti dados, inclui ema nia conta bancária hodi bele recompensa no resolve sira-nia situação, nune'e labele politiza situação ida-ne'e, tanba Senhor Deputado sira husi oposição mós tun diretamente ba terreno hodi haree no ko'alia diretamente ho Sr. Secretário de Estado no haree rasik, katak ita-nia maluk sira desloca ona ba Tasi-Tolu.

Loos katak ita tuur iha-ne'e tanba povo no hodi defende povo nia direito, maibé fatin ida-ne'ebá la'ós fatin atu hela, no fatin ida-ne'ebá fó risco ba sira-nia vida, liuliu iha tempo udan ida-ne'e. Será que ita hakarak husik ita-nia maluk sira hetan acidente husi inundação mak ita foin bá hasai?

Além de ida-ne'e, iha setembro 2023, SEATOU bá halo ona diálogo ho sira, ho ita-nia maluk sira, kona-ba evicção, ho nune'e, dala ida tan, parabéns ba Sr. Secretário de Estado no equipa ba Ita-Boot sira-nia serbisu, no mós ba parte competente sira seluk ne'ebé coopera. Ohin loron ema hotu critica, maibé loron ida hotu-hotu sei agradece tanba SEATOU nia serbisu di'ak.

Ha'u mós hakarak reforça tan katak Governo ho SEATOU tem que identifica uma rihun haat ne'ebé VIII Governo prepara ba *Covid* nian atu população ne'ebé la iha fatin bele bá hela iha-ne'ebá. E mós ida seluk tan, ita-nia maluk Deputado balu hatete katak «Maun Xanana hatete população sira-ne'e haruka bá hela iha *BP7 (Badan Pembinaan Pendidikan Pelaksanaan Pedoman Penghayatan dan Pengamalan Pancasila)*» ha'u sente katak ne'e la'ós sala ida, sira bele bá hela daudauu iha *BP7* tanba fatin luan, fatin boot, população sira bele bá hela daudai iha-ne'ebá, hela provisório. *BP7* ne'e mós uluk iha 99, antes de referendo ne'e, Partido Nacionalista Timorense mak hela iha-ne'ebá, hala'o nia atividades. Mas, depois de eleição, Partido Nacionalista Timorense, como haree katak FRETILIN mesak ita de'it, então ami entrega ba sira, ne'ebe ema hatene katak ida-ne'e la'ós maluk FRETILIN sira-nian de'it, ita hotu, ita hotu bele ocupa, provisoriamente bele ocupa para haree fali fatin seluk ba população sira ne'e bá hela.

Ida-ne'e mak ha'u-nia intervenção.

Obrigado.

Sr.<sup>a</sup> **Presidente:** — De seguida, Sr. Deputado Anacleto Freitas.

Sr. **Anacleto Freitas** (CNRT): — Obrigado ba tempo.

Ha'u-nia respeito ba Presidente Parlamento Nacional ho composição Mesa, mós ba Vice-Ministro dos Assuntos Parlamentares, ba colega Deputado e Deputada sira hotu, ba povo doben Timor laran tomak, bom dia ba ita hotu.

Ha'u hakarak atu foti preocupação povo nian iha kraik, kona-ba uma escola ida iha Posto Lacluta, localiza iha Ai-Manas Rai. Agora uma ne'e kaleen kuak hotu, to'o tempo tama escola, quando udan ne'e labarik sira escola la di'ak, ne'e bee tama hotu sala laran, ne'ebe atu simu lição mós la di'ak. Ne'e ida.

Ida fali mak atu apresenta – Vice-Ministro, bele karik, encaminha hela ba ministério relevante para depois bele haree, resolve to'ok – projeto emergência tolu ne'ebé localiza iha Viqueque, to'o a data parado. Maibé, quando ha'u bá husu, sira dehan hanesan ne'e: «Orçamento ne'ebé Obras tau tiha, ADN tun ba ko'a hotu fali, tanba ne'e mak parado», ne'ebe, sira na'in-rua ne'e talvez serbisu la hamutuk, tanba ne'e mak dificulta ita-nia companhia sira-ne'e atu hala'o serbisu. Ne'ebe, karik bele, hato'o hela ba ministério rua ne'e para bele resolve sira na'in-rua nia diferença ne'e iha-ne'ebé, depois mak bele orienta ita-nia companhia sira para bele serbisu. Emergência mas agora parado hotu, iha Viqueque iha tolu, ida mak iha Uatulari ho Uatucarbau nia klaran, ponte ida, ida mak iha Viqueque Vila, parado agora, ne'ebe, karik bele, Vice-Ministro haree to'ok ida-ne'e atu nune'e bele resolve bá.

Ida fali mak ha'u hakarak halo loos buat balu. Ohin, declaração política husi sorin, liuliu FRETILIN, ko'alia kona-ba moras ne'e dehan ida tebes ida dehan bosok, halo ha'u preocupa uitoan. Ema bá hospital ne'e moras mak bá, maibé dehan bosok ne'e, bosok mak ida ne'ebé karik ha'u la hatene. Ne'ebe ita tem que hato'o buat ne'ebé loos, selae dehan moras tebes mós iha, moras bosok mós iha fali ne'e mak ha'u ladún concorda buat ida-ne'e. Ne'e ida.

Ida fali tan mak ohin declaração política mós ko'alia kona-ba SEATOU nia serbisu ne'e, dehan katak «emergência», ha'u hanoin, linguagem ida-ne'e la pantas atu ko'alia karik, tanba SEATOU, antes ne'e halo tiha ona diálogo ho ninia população sira ne'ebé afetado husi buat ida-ne'e. Antes, tinan ida resin ona, tau tan risco «X» ida mean ne'e para bele hato'o bá sira oinsá sira bele buka ona fatin atu nune'e Estado bele saida... ne'ebe la'ós emergência. Linguagem sira-ne'e ita haree didi'ak mak coloca bá, selae ita coloca arbiru de'it orsida ita-nia população sira mós haree hela. Ne'ebe ne'e la'ós emergência tanba diálogo ne'e momento antes, tinan ida, halo antes tiha ona.

Ha'u hanoin, ida-ne'e mak ha'u bele hato'o iha fatin ida-ne'e.

Obrigado barak.

Sr.<sup>a</sup> **Presidente:** — Tuirmai, ha'u fó kedas tempo ba Sr. Deputado Dário Madeira.

Sr. **Dário Madeira** (FRETILIN): — Obrigado.

Bom dia ba Presidente, Vice-Ministro, distinto Deputado sira hotu.

Iha-ne'e atu ko'alia de'it informação ida ba Sr. Ministro. Acontece iha semana ida liubá, iha Vila Verde, EDTL sira bá halo instalação linha eletricidade ba uma seluk dada fali husi uma ida seluk nia leten, maibé ai-riin eletricidade ne'e iha kedas estrada leten, la foti husi iha-ne'ebá, dada fali husi ema

seluk nia uma leten. Depois, fio ne'e la'ós iha leten, maibé tula fali iha escada uma ne'e ninian, tanba ne'e fó risco. Até uma ne'e ninia construção seidauk conclui tan, tanba ne'e uma-na'in agora exige hela para oinsá EDTL bele muda filafali fio ne'e, tanba ne'e fó risco ba vida labarik sira-nian e ema sira halo construção iha fatin ne'e. Ne'ebe husu para bele tau matan lailais ba ida-ne'e.

Ida seluk, hakarak secunda ba declaração política bancada sira-nian hotu, ne'ebé ohin declara iha fatin ne'e, liuliu liga ba área saúde ninian, ne'e colapso duni. Ita iha-ne'e bele nega, ita be haree tiha iha terreno, ita bele haree realidade sira-ne'ebá ne'e acontece hanesan ne'e, maibé mai iha-ne'e ita nega matamatak, acontece hotu hanesan ne'e, tanba durante feriado Natal ninian ou Tinan Foun nian ne'e, iha centro saúde sira ema balu monu ho motor, ema balu taa kanek nia an, daun hodi suku de'it la iha, até ligadura hodi bobar kanek ne'e de'it la iha, iha Guido Valadares, la iha! Ne'e foin daudauk ne'e, iha dia 24 ho dia 25. Tanba ne'e mak iha-ne'e ha'u hakarak atu husu ba Deputado sira ne'ebé defende loos katak buat hotu-hotu la'o di'ak ne'e: ai-moruk tama ona ka seidauk? Sasán sira ne'ebé necessidade básica be atu halo tratamento ba ema moras, ema kanek sira-nian iha hospital sira-ne'e, ai-moruk sira-ne'e tama hotu ona ka lae? Completo ona ka lae? Ida-ne'e.

E terceiro, ko'alia mós nafatin kona-ba saúde ninian, iha Município Viqueque ne'e iha ambulância momento ne'e sosa tiha ona atu haruka ba Município Viqueque, maibé Sr.<sup>a</sup> Ministra ninia decisão dehan, «fó lai ba Município seluk, Viqueque hein lai», ne'ebe ambulância ne'e la fó. Ambulância ida de'it mak halo operação iha Município Viqueque Vila, e ambulância ne'e agora avaria tiha ona. *Supir* ambulância sira agora bá tuur iha hospital ne'ebá ne'e tuur maran loos iha-ne'ebá, ema telefone mós, sira dehan, «ami carreta la iha». Ida-ne'e. Tanba ne'e husu para bele responde mós ba ida-ne'e.

Agora, ida seluk fali, kona-ba evicção ne'e bele, bele! Depende, balu bele fó parabéns. Ba ha'u, fó parabéns ne'e ha'u moe ba ema sira ne'ebé sai vítima ne'e. Ita fó parabéns ba malu tanba ema balu tanis hela iha ponte okos, ita fó parabéns ba malu tanba ema balu lakon hela ninia hela-fatin, tanba ne'e mak aprecia ba serbisu ba Governo ninian ne'e tem que ita sukat mós ninia impacto, ninia consequência ne'e iha-ne'ebé, ne'e para ita-nia parabéns, ita-nia apreciação ba malu ne'e bele iha fatin, selae ne'e ninia fatin la iha. Tanba ema fó parabéns ba malu, ita la compreende, ita mós fó tuir de'it, maibé ita la entende didi'ak parabéns nia sentido ne'e saida.

Exemplo, ema sira iha-ne'ebá la'ós lakohi muda, *memang* hakarak muda sai, e FRETILIN mós concorda, cidade Díli tem que hadi'a. Maibé, antes, bá halo diálogo ne'e decisão diálogo ne'e Ministro executa ka lae? Ka decisão husi diálogo ne'e bá muda obrigatório? Ha'u hanoin, ida-ne'e Ministro bosok karik, Secretário de Estado ne'e bosok karik. Mas, ha'u la fó sala ba Secretário de Estado ne'e, ha'u haree liu Sr. Primeiro-Ministro mak tem que haree didi'ak ba sasán sira-ne'e.

Atu hotu, ha'u mós hakarak ko'alia kona-ba declaração bancada sira-nian, ha'u aprecia ba declaração bancada haat nian ne'ebé ohin halo iha-ne'e. Liuliu ba Bancada PD nian, ha'u husu para declaração bancada nian ne'e bele to'o Vice-Primeiro-Ministro nia liman, para bele hola buat ruma iha

reunião Conselho de Ministros nian para bele muda, bele hadi'a, tanba evicção la pára ho Fomento II de'it, alargamento estrada mós evicção tem que la'o nafatin. E, ne'e claro, ne'e ha'u concorda, mas evicção ida ita halo ne'e ita muda uluk ema ne'e para ita bele loke. Por exemplo, ó halo tiha indemnização nia lakohi sai, ó bá sobu! Be ó la cria condição para nia atu sai ne'e? Governo labele usa força povo ninian, polícia ho F-FDTL, bá assalta fali ninia povo rasik, ida-ne'e labele! Ne'e ita ukun fali hanesan uluk ditadura sira-nia tempo ne'e. Nação agora ne'e la'ós ida-ne'e ona. Desenvolvimento nia alvo ne'e mak povo sira ita muda sai ne'e, ita halo desenvolvimento povo sai vítima fali, povo la hetan benefício sira-ne'e.

Sr.<sup>a</sup> **Presidente**: — Muito obrigada, Sr. Deputado.

Sr. **Dário Madeira** (FRETILIN): — Nada barak.

Sr.<sup>a</sup> **Presidente**: — Ya! De seguida, ha'u bolu kedas Sr. Deputado Natalino dos Santos.

Sr. **Natalino dos Santos Nascimento** (CNRT): — Sim, obrigado.

Bom dia ba Sr.<sup>a</sup> Presidente, Mesa e Sr. Vice-Ministro dos Assuntos Parlamentares, colegas distintos Deputados.

Iha assunto rua mak ha'u hakarak foti:

Primeiro, ha'u husu ba Vice-Ministro atu fó informações, liuliu ba Secretário de Estado SEFOPE, atu haree kona-ba ita-nia trabalhador timoroan sira que ita haruka bá Austrália e bá Coreia. Sira, depois de liu processo, tuir contrato bá serbisu, balu bá to'o iha-ne'ebá fulan ida fulan rua halai sai tiha husi sistema. Ha'u haree, ne'e precisa atu halo controlo, e tem que fó informações oinsá Ministro dos Negócios Estrangeiros, depois halo coordenação ho consulado, ho embaixada sira, para bele controla ita-nia ema sira-ne'e. Ida-ne'e ha'u husu para tau atenção. Sira-ne'ebé atu bá serbisu, bá tuir regra, tempo determinado, e agora sira bá mak nune'e, quando iha buat ruma, aban-bainrua sei taka dalan fali ba ita-nia timoroan sira seluk.

Segundo, ha'u husu Sr. Vice-Ministro atu ko'alia ho Ministro dos Transportes e Telecomunicação atu haree kona-ba folin *ticket* ne'e. Folin *ticket* ne'e, ita haree, boot tebetebes, *Citilink* ne'e 265 USD, ne'e bá de'it, *Aero Dili* 270 USD, bá de'it.

*Aero Dili* ita iha subsídio, favor ida haree ida-ne'e! Ou karik iha avião seluk hakarak atu tama para depois sira bele halo competição. Ida-ne'e problema boot e preocupação, tanbasá mak folin *ticket* ne'e karun tebetebes.

Terceiro, ha'u husu colega sira, ita tem que iha consciência katak Estado ne'e tem que organiza, tem que la'o duni, hala'o duni ordenamento. Se ita la hahú agora, bainhira? Ita iha lei tiha ona e

decreto-lei, mas ita la halo. Agora IX Governo Constitucional comprometido, ho Secretário de Estado SEATOU atu organiza, ordena, e buat ne'e lei iha ne'e. Se ita la organiza Estado ida-ne'e, bainhira tan? Ita tem que hahú organiza duni.

E questão ida foin daudauk iha-ne'ebá ne'e ita haree katak *bertepatan* ho desastre, inundaçãu mota. Quase maioria, horseik ha'u liu husi Kampung Tuti, iha mota-ibun sira-ne'e ema começa sobu dadaun ona, hatudu katak população sira iha consciência duni, consciente duni. E processo diálogo la'o tiha ona iha setembro to'o novembro, halo explicação tiha ona, fó tiha aviso ona, to'o Kasnafar ne'ebá, fó tiha ona aviso, ne'ebé hela iha mota-ninin ne'e risco, tem que prepara an sai. Tau hotu sinal tiha ona e agora ita mai haree ita ko'alia kona-ba... Agora, se mota lori sira, violação direitos humanos ne'e ko'alia ka lae?

Então, Estado ida-ne'e tem que iha duni, tem que brani, halo duni decisão ba Estado ida-ne'e, que ita hatene lei iha.

Lei ne'e saida? Essência lei saida? Iha buat tolu: lei ne'e *mengatur mengikat dan memaksa*, ne'e essência husi lei, fundamentos lei ne'e. *Kalau mengatur tidak mau*, tanba lei ne'e *mengikat, kalau dia tidak mau melaksanakan, dipaksa!* Ne'e essência husi lei. Colega sira hasai Direito ne'e haree to'ok be essência husi lei ne'e, buat tolu mak importante, *Bahasa* dehan lei ne'e *mengatur, mengikat dan memaksa*. Agora ita la haree ba questão ida inundaçãu mota ne'ebá, depois Governo, Estado preocupa bá hasai, ita bá haree fali questão sira seluk. E Governo halo tiha ona, integrado, MOP mós iha-ne'ebá hotu ona, tanba ne'e ha'u husu colega sira, ita iha sensibilidade ituan bá.

Ha'u foti tiha ona, ema sira ocupa ilegal iha 1999 uma Estado nian ita tem que ordena, organiza, orienta para selu ba Estado, tau preço! Sira ne'ebé halo uma andar iha rai Estado nian ne'e crime.

Ita sempre mai tinan-tinan receita domestica ne'e ki'ik tebetebes, então Governo começa daudauk ona. Ha'u segunda ohin, dehan iha Farol ne'ebá tem que organiza duni ona. Foin daudauk, semana uluk, ha'u foti ona, iha residência Presidente Parlamento nian oin ne'ebá ema começa lere, iha tasi-ibun ne'ebá ema fa'an daudauk ona, aban-bainrua, quando saida... ne'ebá tem que indemniza.

Iha social nia sorin ne'ebá uluk indemniza tiha ona, agora bá halo filafali uma iha-ne'ebá tiha ona, tem que haree duni! Hakarak iha-ne'ebá, *tanah* ne'ebá *kelas 1*, tem que selu! Ema sira ocupa ilegal ne'e tem que selu uma, selu mós ho rai, la'ós 10 USD, 20 USD, 30 USD, tau classificação para Estado ne'e bele hetan.

Ha'u aprecia SEATOU nia serbisu, e, Governo comprometido atu organiza, reorganiza Estado ida-ne'e. Se ita ta'uk, bainhira tan? Lei iha, nu'usá mak la halo? Tanba ne'e ha'u husu atu ita hotu mai haree. Maibé, Governo mós iha dever atu haree, agora daudauk atu selu ona, fó compensação. Ita habitua atu sai iha fatin ida, hetan tiha indemnização, bá halo fali iha fatin seluk para depois hetan nafatin compensação...

Sr.<sup>a</sup> **Presidente**: — Muito obrigada, Sr. Deputado.

Sr. **Natalino dos Santos Nascimento** (CNRT): — ... tanba ne'e ha'u la simu dehan katak Governo ne'e Governo tirano, ukun ho liman besi. Iha lei, lei iha hela ne'e? SEATOU halo ne'e tanba implementa lei.

Obrigado.

Sr.<sup>a</sup> **Presidente**: — Muito obrigada.

De seguida, Sr.<sup>a</sup> Deputada Sancha Tilman.

Sr.<sup>a</sup> **Sancha Margarida Tilman** (PD): — Di'ak, obrigada, Sr.<sup>a</sup> Presidente.

Ha'u-nia respeito ba Sr.<sup>a</sup> Presidente no composição Mesa, Excelência Vice-Ministro dos Assuntos Parlamentares, maluk rona-na'in sira hotu no povo doben Timor-Leste, bom dia ou boa tarde ba ita hotu.

Iha loron ida ohin, mesmo continuação ba Ano Novo, maibé iha lamentação ne'ebé ha'u rona, simu rasik husi maluk sira husi foho, kona-ba condição estrada iha Posto Administrativo Fohorém ne'ebé aat hotu. liuliu iha Aldeia Fatuk-Laran, fatuk nakonu iha estrada laran sai fali hanesan mota ka bee dalan iha estrada laran, tanba ne'e população la bele halo sira nia movimento bá-mai.

Iha parte Hali-Mutin sikun rai monu iha estrada laran, nune'e dificulta tebes população sira atu halo sira-nia movimento. Nune'e mós, sira ta'uk, wainhira sira liu karik dala ruma rai ne'e bele fó mós risco ba sira.

Tuirfalimai, iha Suco Dato Rua, iha Aldeia Hali-Laran, rai halai taka metin estrada laran hanesan mós ohin ha'u hatete. Husu ba Ministério no parte competente atubele tau atenção ba situação sira refere ho urgentemente atu nune'e labele cria fali condição ne'ebé la di'ak ba população tanba ida-ne'e afeta tebes sira-nia moris loroloron nian. Nune'e husu ba ministério ka parte relevante, agora daudauk ita iha tempo udan, atubele cria ka bele hamosu atividade ida ne'ebé liga ho fumigação mosquito atu nune'e bele previne moras Dengue iha rai-laran.

Tuirfalimai, atu hatete mós kona-ba ai-hun sira ne'ebé ho idade tuan ona iha estrada-ibun iha cidade laran no mós iha foho, husu ba ministério ka parte relevante atubele buka sira-nia política oinsá mak atubele kuda fali ai-horis hodi substitui ai tuan sira-ne'e, nune'e labele fó risco ba ema hotu-hotu wainhira halo movimentação iha cidade laran, ou nune'e mós iha foho.

Ha'u hanoin, ba momento ida-ne'e ha'u nia intervenção mak ne'e deit, ha'u husu ba Sr. Vice-Ministro dos Assuntos Parlamentares, ho situação ne'ebé ita hasoru daudauk hanesan ohin ha'u refere, favor ida, husu ba ministério relevante sira atubele tau atenção ba ida-ne'e, tanba, liuliu ita ko'alia kona-ba estrada, ita tem que haree mós ba manutenção ba estrada sira-ne'e. Se ita hein de'it to'o

estrada ne'e aat liu mak ita foin hadi'a, ida-ne'e ninia implicação ba custo aas tebes, wainhira ita debate orçamento, nia custo ne'e aas, sa'e ba beibeik. Mas, wainhira ita cria ita-nia política ne'ebé di'ak atu halo manutenção ba fatin sira-ne'e, ha'u sente, ida-ne'e bele minimiza custo ne'ebé ita sei gasta oinmai.

Kona-ba fumigação de mosquito, ida-ne'e mós ha'u husu atubele oinsá mak hare assunto ida-ne'e ho sério tanba ita ko'alia kona-ba assunto saúde, ita labele haree de'it parte seluk, maibé ita haree mós ba situação ki'ik sira-ne'e tanba situação sira-ne'e mak afeta ba ita-nia saúde ne'ebé boot.

Nune'e mós, ikusliu, atu hatete iha fatin ida-ne'e katak ita labele haluha mós haree kona-ba AIFAESA, kona-ba hahán. Dala ruma mós ita moras ne'e afeta husi químico ne'ebé ita consome, ida-ne'e mak bele fó moras ba ita. Husu dala ita tan atubele tau atenção ba buat sira-ne'e.

Obrigada barak.

Sr.<sup>a</sup> **Presidente**: — De seguida, o Sr. Deputado Abel dos Santos.

Sr. **Abel dos Santos** (PLP): — Obrigado ba tempo.

Ho respeito, boa tarde ba Excelência Presidente Parlamento ho Vice-Ministro dos Assuntos Parlamentares, colega Deputado sira hotu, povo doben Timor-Leste mak ha'u hadomi.

Primeiro ha'u segunda declaração Bancada PLP, Bancada FRETILIN, PD ho KHUNTO nian. Iha-ne'e ha'u atu hatutan no hakle'an katak declaração política ne'ebé Bancada PLP halo kona-ba evicção ne'ebé SEATOU halo ne'e loos! Hau dehan loos tanba sa'ida? Evicção ba ita-nia comunidade sira ne'ebá ita atu hatete deit, la'ós SEATOU mesak, iha-ne'ebá serbisu equipa boot ida, ne'ebé envolve ministério lubuk ida, envolve iha-ne'ebá. Exemplo, hanesan parte educação, saúde, obras públicas, justiça, terras e estatal, maibé hira ne'e la haree oin. Então atu hatete de'it, durante ita hakilar malu iha fatin ida-ne'e, beibeik hela deit, tanba evicção ne'ebé SEATOU halo ne'e tanba falha iha Governo rasik, falha ne'e tan de'it comunicação sira-nian ladún di'ak. Se, exemplo, sira-nia comunicação di'ak para ida-idak iha responsabilidade ba ninia knaar hodi halo evicção ba ita-nia comunidade sira-ne'e, ha'u sente, ema hotu-hotu contribui. Ba sé de'it, atu hatete de'it, contribui ba cidade atu sai nabilan hanesan nação seluk ne'e, ha'u sente, ema hotu contribui, só que falha iha ida, ne'ebé Governo la iha condição ba ita-nia comunidade sira antes de hasai.

Ohin iha ita-nia Deputado barak ko'alia tiha ona, antes hasai ita-nia comunidade sira-ne'e halo ona diálogo, buat barak halo hotu ona, só que falha nafatin iha ida deit, diálogo halo hotu ona, mas promessa ne'ebé halo iha diálogo husi Governo ba ita-nia comunidade sira-ne'e Governo la halo tuir, ah ida-ne'e mak falha, ida-ne'e mak ita han malu. Se, exemplo, promessa iha diálogo ba ita-nia comunidade sira-ne'e Governo atende ho di'ak, ha'u sente, ema hotu-hotu contribui ba cidade ne'e ninia nabilan karik. La'ós Timor-Leste mesak mak hanoin atu halo, ita acompanha, iha nação seluk



ema hotu halo hanesan Timor-Leste halo, maibé, ema nian la'ó di'ak hela. Tanba saida? Cooperação ne'ebé di'ak entre ministério sira hotu, entre comunidade ida-ne'ebé ita atu aloca ne'e rasik. Ne'e ida.

Iha parte seluk fali, ohin declaração husi Partido FRETILIN nian liga uitoan ba *show* ne'ebé foin lailais acontece, halo iha Guido Valadares, ba pessoal ha'u, atu hatete deit, pessoal sira-ne'ebé halo *show* iha-ne'ebá ne'e ema ne'ebé fuan, klamar hotu la iha ona isin-lolon. Ne'e troça boot ida, direito atu halo *show* ne'e direito, ema hotu bele halo, maibé la'ós fatin mak ne'ebá. Timor ne'e rai luan, nu'usá mak tem que bá halo palco boot ida, sai fali palco ba *show* iha Guido Valadares ne'ebá ne'e? Ne'e troça, halo troça ba ema ne'ebe agora toba hela iha-ne'ebá. Fatin ida-ne'ebá fatin ida-ne'ebé paciente sira precisa hakmatek, descansa ho di'ak, para bele recupera lailais sira-nia saúde. Mas, fatin ne'ebá sai fali palco boot ida atu bá halo fali ita-nia porcaria sira-ne'e iha-ne'ebá, ida-ne'e precisa tau atenção, Vice.

Iha parte ida fali, ha'u liga uitoan ba ita-nia colega Deputado Manuel husi Bancada PD ohin hato'o, kona-ba escola ne'ebe ita-nia parte educação taka iha Suco Fahinehan.

Excelência Vice, ha'u preocupa uitoan, hanesan representante povo no preocupa uitoan mós hanesan Manufahi nia oan, ita hanoin hela atu cria condição di'ak balu iha-ne'ebá, maibe, plano Governo nian oin-seluk fali, taka tan mak iha. Ida-ne'e mak ita hateten «labarik sira mak futuro Nação ninian?» *Sedangkan* Governo de'it la cria ona condição, sá futuro mak ba labarik sira-ne'e? Futuro ne'e tem que liuhusi educação ne'ebé di'ak atu forma ita-nia oan ne'e, ida-ne'e mak dehan, «labarik sira-ne'e nu'udar futuro Nação ida-ne'e nian». Agora, Governo de'it la iha plano, plano ladún di'ak, hamate tan futuro, depois ita dehan, «ida-ne'e futuro Nação nian».

Obrigado, Presidente.

Sr.<sup>a</sup> **Presidente**: — Muito obrigado.

Ha'u husu ba Distinto Deputado sira atu atenção ba tempo, tanba um minuto a cada também no fim do dia já são minutos contados. Tanba sei iha um, dois, três, quatro, quinto, e seis Deputados, mais três Deputados das últimas intervenções ba declaração política sira, ne'ebe, haree ba tempo.

De seguida, o Sr. Deputado Joaquim dos Santos.

Sr. **Joaquim dos Santos «Boraluli»** (FRETILIN): — Obrigado, Presidente.

Bom dia ba Sr.<sup>a</sup> Presidente, membros Mesa, no povo Maubere tomak, saudações revolucionárias!

...

Sr. **Deputado sira husi FRETILIN**: — Sempre revolucionárias!

Sr. **Joaquim dos Santos «Boraluli»** (FRETILIN): — ... Ha'u hakarak sekunda declaração política Bancada FRETILIN ho PLP nian, nune'e mós ho Bancada PD nian, ho síntese ida hanesan tuirmai ne'e:

Primeiro, kona-ba PD nian, liga ho estrangeiro mai loke kios to'o aldeia, ha'u lori filafali ita bá dia 24 junho de 2023, iha documento *Série A, n.º 9, Jornal do Parlamento Nacional*, iha-ne'ebá, ha'u declara tiha ona, Governo seidauk hatán to'o agora.

Depois, iha discussão Orçamento Geral do Estado, ha'u husu dala tolu ba Governo, Primeiro-Ministro, Ministro tutela mós la hatán. Felizmente, ohin Deputado husi bancada Governo, colega Conceição, lori ita bá atu reflete filafali situação ne'e.

Iha *Jornal da República*, página, – não disse aqui, mas, orsida mak ita sei aprova karik – ha'u dehan hanesan ne'e: «Iha momento ne'ebá, chinês sira tama mai iha Timor loke kios ne'e iha IV Governo. Primeiro-Ministro mak Sr. Xanana, Ministro do Turismo, Comércio e Indústria mak Sr. Francisco Kalbuady Lay», hela claro.

Ha'u mós husu, iha momento ne'ebá, atu halo revisão ba política ne'ebe la pró ba nacionalista, mas defende fali comerciantes estrangeiros. La iha resposta! Ne'ebe, aproveita declaração Bancada PD nian, ha'u husu ba ita hotu halo reflexão ba decisão ne'ebe fó prejuízo ba cidadão nacional sira-nia direito. Portanto, ita-nia decisões atu protege cidadão em geral tuir lei, tuir Constituição, la'ós atu defende fali favoritismo político, e, ha'u considera situação ne'e causa husi favoritismo político. Ita tem que evita ida-ne'e!

Segundo, ha'u hakarak atu sustenta declaração husi FRETILIN ho PLP nian hanesan ne'e: Kona-ba evicção, ita, quando haree ba espírito da lei ho Constituição, liuliu artigo 54 n.º 3, ita-nia Estado hasai lei lubuk ida ho lei complementar atu cumpre, liuliu Lei de Expropriação ho Lei de Despejo Administrativo ninian, regulamento sira kona-ba ida-ne'e.

Iha discussão durante ne'e ita *fokus* iha-ne'e, katak ita-nia membro Governo sira la cumpre procedimento ne'ebe lei ne'e haruka, sira cumpre de'it mak competência ne'ebe lei fó ba sira. Hatudu incapacidade funcional hodi intervém ho força, lei la obriga ida-ne'e, lei la husu ba sira atu intervém ho força, intervém ho diálogo, ho ação humanismo, ne'e maka lei husu. Então, saida mak ha'u halo, conclusão provisória iha-ne'e, ba ita-nia reflexão, iha ponto haat iha-ne'e:

Primeiro, kona-ba evicção ne'e, ação Governo nian, liuliu governante sira-nian, hahú ho halo proteção ba cidadão nia moris ne'ebé Constituição garante, tanba ne'e mak precisa condições preliminares antes de foti ação hodi halo evicção. Ida-ne'e Governo la cumpre, procedimento sira-ne'ebe tuir loloos Governo tem que cumpre ne'e mak baseia ba Lei de Expropriação.

Sr.<sup>a</sup> **Presidente**: — Muito obrigada, Sr. Deputado.

Sr. **Joaquim dos Santos «Boraluli»** (FRETILIN): — ... Se – ha'u conclui, Presidente, para ha'u-nia raciocínio hela claro...

Sr.<sup>a</sup> **Presidente**: — Por favor!

Sr. **Joaquim dos Santos «Boraluli»** (FRETILIN): — ... problema la'ós tempo de'it, ita atu resolve Estado nia problema ...

Sr.<sup>a</sup> **Presidente**: — Mas, bele loke debate, selae ita-nia tempo ne'e la to'o.

Sr. **Joaquim dos Santos «Boraluli»** (FRETILIN): — ... Se Ita intervém, ha'u-nia raciocínio ne'e la loos. Ha'u husu atu halo conclusão lai.

Kona-ba condições...

Sr.<sup>a</sup> **Presidente**: — Sr. Deputado, conclui, por favor!

Expropriação ba terreno do Estado, ne'ebe Ita-Boot sira iha Comissão haree didi'ak lei sira-ne'e!  
De seguida, Sr.<sup>a</sup> Deputada Helena Martins.

Sr.<sup>a</sup> **Helena Martins** (FRETILIN): — Obrigada dala ida tan.

Boa tarde ba ita hotu.

Primeiro, ha'u reforça nafatin ami-nia bancada kona-ba saúde.

Ha'u hakarak husu ba colega sira-ne'ebé hatete katak «membro comissão refere la iha direito atu halo declaração ou intervenção ba assunto refere», ne'e iha Regimento ne'e la iha artigo ruma ne'ebé hatete ida-ne'e. Ne'e tem que claro! Selae, ita rasik mak halo confusão fali iha ação ida-ne'e.

Ha'u atu hateten de'it, horisehik ha'u-nia família, ha'u-nia sobrinho rasik hetan acidente, e horikalan to'o tuku 2 ami continua assiste hela nia, oinsá mak halo tratamento. Maibe, facto mak hanesan ohin Deputado Mandati hateten ne'e, ida-ne'e mak loos! Ne'e para ita labele dehan katak ami politiza. E, dalan mak oinsá mak família tem que resolve, liuhusi meios atu selu mesak. Ida-ne'e duni! Acontece iha Baucau, tem que transfere mai Díli, ida-ne'e mak dalan, tan ne'e mak ita foti questão ne'e atu oinsá Governo ida-ne'e, liuliu Ministra Saúde, hadi'a, la'ós dehan fali ami mai foti ne'e atu manán antena, ne'e la iha!

Tuirmai, ha'u hakarak hatete kona-ba evicção, ohin colega balu mós hatete, halo evicção ne'e tem que tuir buat ne'ebe ami-nia Camarada Deputado Boraluli hatete, «Ita tem que respeita mós Lei de Expropriação ne'e». Agora daudauk sira bá halo marcação de'it iha fatin sira-ne'e, depois la iha tan negociação, la lori tan fali notificação escrita, obriga sira tem que evacua. Balu lori ona ba Município

mak halo fali administração, ida-ne'e mak má administração, hanesan ohin Deputado Luis hatete ne'e. Ida-ne'e! Atu halo gestão ne'ebe di'ak ne'e oinsá mak cria condições uluk, depois mak ita evacua ita-nia ema sira-ne'e.

Ba halo cidade moos ho furak ne'e ita hotu aceita, maibé, ita-nia ema sira-ne'ebe agora daudauk ne'e, apenas – iha Fomento II – seis habitações ka famílias mak hetan uluk mota tun, nu'usá mak tem que *sapu rata* tiha fali iha época udan ne'ebé ema barak mak terus ida hanesan ne'e? Ita-nia sentimento humano tau iha-ne'ebé? Ita labele lori fali força ne'ebé ran ho ruin nia folin hodi obriga fali ita-nia povo ne'e sai fali vítima ba Rai ida-ne'e. Ida-ne'e labele duni! Tanba ne'e, ita garante nafatin, fó confiança nafatin para povo ne'e bele seguro ba sira-nia decisões. Tanba ne'e, iha artigo 44.º, iha alínea 1 no 2 ne'e hateten, Ita-Boot sira bele lê rasik iha-ne'ebá, liberdade de circulação, iha fatin ne'ebé de'it, iha território Timor-Leste ema escolha livre ema atu hela. Ida-ne'e ita tem que haree! Tem que haree ida-ne'e!

#### *Protesto husi CNRT.*

Se ita-boot sira la saida... ha'u halo claro para ita-boot sira bele acompanha, «Todo o indivíduo tem o direito de se movimentar e fixar residência em qualquer ponto do território nacional». Ne'e primeiro.

Segundo, «A todo o cidadão é garantido o direito de livremente emigrar, bem como o direito de regressar ao país», ne'e ka? Ne'ebe Ita-Boot sira, labele haha, huhu, haha, ida-ne'e mak sentimento ne'ebé Ita-Boot sira la iha duni. Ita-Boot sira labele mai kesi ikun para hetan apoio de'it, maibe, ita tem que tau consideração ba ita-nia povo nia sentimento, saida mak sira sente daudauk, ida-ne'e mak ita tem que considera. Ita labele mai defende atu ita-nia tuur ne'e tem que metin para ignora fali.

Ikusliu, ha'u atu hatete kona-ba, ami-nia Presidente Comissão mós hatete, «ami la bá halo fiscalização». Pena! Ami atu bá halo fiscalização para halo fali drama iha ema terus nia oin? Ida-ne'e dúvida boot.

Foin lailais, iha dia 9, Presidente, ita concorda malu atu bá iha fatin evicção ninian, ita tuituir malu bá iha-ne'ebá. Saída mak acontece? Ita tem que filafali tan de'it ita ta'uk, ida-ne'e mak realidade, tanba daudauk ema ne'e sei iha-ne'ebá. Condições ne'ebe iha quarentena ne'e la permite duni ita-nia ema sira atu hela iha-ne'ebá, sentina la moos, bee la iha, fatin la adequado duni atu tau sira husi evicção ne'e iha-ne'ebá. Ida-ne'e mak realidade.

Ita tem que hateten buat ne'ebe loos para Governo ne'e bele hadi'a, labele mak gestão sala, ita dehan «loos ona», depois, sé mak atu lori fali sala ida-ne'e? Ida-ne'e mak ha'u hakarak frisa tan. Tan ne'e mak tempo ona atu ita hatete buat loos para hadi'a daudauk ona ba bem-estar povo ida-ne'e nian,

tanba Rai ida-ne'e la'ós ema ida de'it mak halo funu, povo inocente mós hotu-hotu fó vida e terus ba Rai ida-ne'e.

Obrigada, Presidente.

Sr.<sup>a</sup> **Presidente**: — De seguida, o Senhor Deputado José da Cruz.

Sr. **José da Cruz** (FRETILIN): — Obrigado, Presidente.

Ha'u-nia boa tarde ba Ita-Boot ho composição da Mesa, Sua Excelência Vice-Ministro dos Assuntos Parlamentares, colega Deputado no Deputada sira hotu, povo Maubere no Buibere tomak, saudações revolucionárias!

**Sr. Deputado sira husi FRETILIN**: — Sempre revolucionárias!

Sr. **José da Cruz** (FRETILIN): — Primeiro, hakarak sustenta declaração Bancada FRETILIN nian sobre assunto saúde no evicção, ne'ebé Bancada haat ohin loron ko'alia iha Plenária ida-ne'e.

Atu hateten katak situação saúde ne'e ita ko'alia iha-ne'e tinan ida resin ona, atu ba tinan rua, mas situação mantém, hotu-hotu ko'alia. Ne'e hateten katak promessas ne'ebe Primeiro-Ministro mai apresenta iha-ne'e, katak iha tinan 2024 atu resolve, afinal de contas la consegue resolve problema hirak ne'e e continua la'o hela de'it, no fim, ita iha Plenária tem que foti hela de'it. Ida-ne'e mak situação e realidade.

Situação ida-ne'e hatudu momoos katak problema iha nível nacional, problema saúde, até que la'ós halo atendimento ba problema saúde sira-ne'e, no fim, halo fali *fashion show* ou *catwalk* iha Hospital Nacional Guido Valadares ne'ebá, ema sonke tun sonke sa'e, doko kidun tun-sa'e iha-ne'ebá. Ne'e hanesan troça ba ema sira-ne'ebé moras no família sira-ne'ebé ninia ema lakon vida iha-ne'ebá.

Tuirmai, ha'u hanoin, ita tem que halo fiscalização ida profunda to'o iha nível rural sira-ne'e para hatene realidade iha-ne'ebá.

Tanba saida mak ha'u dehan nune'e? Iha Município Bobonaro, Posto Administrativo Bobonaro, iha Suco Lour, centro saúde ne'e taka tinan ida resin ona, tinan ida resin ona! Ha'u la hatene, povo iha-ne'ebá nunca hetan atendimento durante tinan ida resin. Ida-ne'e mak ita dehan «di'ak»? Ida-ne'e mak ita fó parabéns? Ha'u hanoin, ita tem que fó parabéns no apreciação ne'e ba buat ne'ebé di'ak, buat ne'ebé ema hotu-hotu sente, tanba Governo ida-ne'e comprometido atu la husik ema ida ka povo ida hela iha kotuk. Ne'e ninia compromisso ne'ebé hato'o iha Programa IX Governo nian, mas realidade lae.

Tuirfalimai, evicção, ne'e situação ida que *ril*, maibé ita hotu-hotu iha-ne'e balu fó parabéns, fó apreciação ba desempenho ne'ebé Sr. Secretário de Estado SEATOU halo. Maibé, ha'u dehan, ita fó

parabéns ne'e tem que haree lai nia desempenho ne'e halo nu'usá. Processo ne'ebé loloos ne'e funcionamento institucional, la'ós autoridade individual ne'ebé amostra iha público ne'ebá hanesan fali Estado ida-ne'e nia órgão Estado, instituição Estado ne'e função la iha. Tau osan iha-ne'ebá ne'e atu halo saida? Aprova osan iha-ne'ebá ne'e atu fó funcionamento ba instituição ida-ne'e. Antes halo despejo ne'e, pelo menos, la'ós de'it bá marca, la'ós de'it bá diálogo, la'ós de'it bá notifica, maibé tem que buka atu hatene sá problema mak contém iha objetivo evicção ne'e rasik. Problema social, problema economia, problema direitos humanos, ne'e iha objetivo ida atu halo despejo ne'e rasik. Loloos ne'e iha equipa *taks force* ida di'ak atubele halo serbisu ida conjunto, mas na realidade lae, ne'e brutal, ita bele dehan. Halo hotu tiha mak foin hetan parecer husi público katak «nu'usá la coloca ema sira-ne'e ba iha centro isolamento Tasi-Tolu ne'ebá?», foin mak hakfodak ba iha-ne'ebá. Mas, ema sira-ne'ebé iha Bidau, iha Ai-Tarak Laran, la consegue hetan fatin ida di'ak, ne'e tanba ita la consegue halo levantamento ida di'ak. Se ita halo levantamento ida di'ak, parece ita iha solução ida di'ak, solução ida adequada ba situação ida-ne'ebé ita atu enfrenta. Ne'e problema ita-nia haree ladún moos, tanba funcionamento instituição la iha, ema nia função mak iha fali. Ne'e problema! Ne'ebe, se ita atu fó parabéns, apreciação, tem que haree, la'ós ema ne'e hanesan *robot* be ema buti botão buti *on* foin nia book an, *off* nia mate. Ha'u hanoin, ida-ne'e labele acontece iha Rai ida-ne'e.

Ha'u hanoin, ida-ne'e mak ha'u hakarak hato'o iha lokraik ida-ne'e.

Obrigado barak, Presidente.

Sr.<sup>a</sup> **Presidente**: — De seguida, Sr.<sup>a</sup> Deputada Maria Rosa da Câmara. (02:33:32)

Sr.<sup>a</sup> **Maria Rosa da Câmara «Bisoi» (CNRT)**: — Obrigada ba tempo, Presidente.

Boa tarde ba Vice-Ministro no mós ba Deputado sira hotu.

Ha'u atu ko'alia kona-ba lixo, maibé ohin Deputada Olinda foti, ha'u confirma de'it Deputada Olinda nian, katak iha Fatuahi ne'e agora daudaun bá fakar plástico, buat hotu iha-ne'ebá ne'e ita tun ba ne'e la di'ak. Quando udan tau, mota tun, lori hotu fali ba, iha Akanunu ne'ebá ne'e, daudaun ne'e, lixo maka'as loos. Governo tem que haree, tau to'ok sinal ruma iha Fatuahi ne'ebá atu ema labele bá fakar fo'er iha leten ne'ebá tanba, quando lixo maka'as hanesan ne'ebá, ema seluk sei ba tau tan, tau tan, ita haree katak situação ida ba lixo iha Fatuahi ne'e sei maka'as, tun ba Akanunu ne'ebá ne'e aat loos. Ne'ebe husu ba Ministro atu tau atenção kona-ba ida-ne'e.

Segundo, atu ko'alia kona-ba SEATOU nia serbisu, Sr. Deputado sira labele considera fali hanesan Deputado balu dehan ne'e, «hanesan tau pilha mak ko'alia de'it, tau pilha mak lian de'it», labele ko'alia hanesan ne'e! Deputado ne'e iha direito tuur iha-ne'e atu analisa, atu ko'alia, Deputado ne'e tem que serbisu tuir lei! Deputado labele ba discute fali iha público hanesan ne'ebá ne'e, ne'e Deputado foti lei ida-ne'ebé, lei número ida-ne'ebé Deputado tun ba intervém diretamente hanesan

ne'ebá ne'e? Fiscalização ne'e bá fiscaliza, mai discute iha Comissão, hatama relatório iha Parlamento, ida-ne'e mak lei. Mas, Deputado nia intervenção tun ba hanesan ne'ebá ne'e, ida-ne'e mak dehan katak consome husi li'ur mak bá halo de'it, la'ós hasai nia matenek. Hanesan ami ne'e mak la escola be hanesan ne'e karik di'ak, Deputado sira tuur iha-ne'e mesak ema intelectual, ema matenek, ema *Sarjana*, Doutor de'it, mas ha'u quando haree televisão ne'e ha'u mak moe filafali Ita-Boot sira-nia parte ne'e.

Agora, temi kona-ba luta uluk ho agora, ha'u hakarak hateten hanesan ne'e: uluk ne'e manán independência, agora ne'e atu manán desenvolvimento. Uluk ne'e mak ami la escola ne'e, agora daudaun desenvolvimento atu matenek, atu hadi'a Nação, atu hadi'a cidade, atu hadi'a futuro ba ita-nia geração sira-ne'e, labele compara filafali ba ida uluk luta ne'e! Ida uluk luta ne'e, ha'u hakarak ko'alia loloos, ita la espera dehan katak ha'u atu moris, mas agora daudaun moris liu tiha ona ne'e hakarak desenvolvimento, cidade ne'e moos, matenek, ida-ne'e mak lógica.

Sr. Deputado sira, Ita-Boot sira-nia declaração ne'e, ha'u hakarak hatete, – ba Deputado sira ne'ebé la gosta rona, di'ak liu lalika rona tiha de'it, hasai tiha buat ida iha tilun ne'e, hasai tiha husik ko'alia tesik iha-ne'ebá bá – Governo ne'e iha direito serbisu iha tinan ida-ne'ebé define ba nia, cinco anos, ne'e nia tem que serbisu hotu ona. Ha'u hakarak hatete, Ita-Boot sira tuur iha-ne'e ne'e membro, ita tuur iha-ne'e ne'e membro, ita-nia liderança sira apoia malu hela iha-ne'ebá, dehan katak «cidade ne'e tem que moos, nação Timor ne'e tem que iha desenvolvimento atu tama iha ASEAN», ne'e ha'u mak ko'alia ka? La'ós ida! Liderança sira mak ko'alia iha-ne'ebá. Acompanha mós *youtube* ne'e, acompanha mós televisão no rádio ne'e! Labele mai ko'alia de'it iha-ne'e! Ita ko'alia, ko'alia Germano mak aat liu, Germano atu leba ba ninia feen oan, ba ninia uma, ba ninia geração de'it ka? Nia halo hela hanesan ne'ebá mós buat ne'e rai hela ba nação Timor ninia di'ak ne'e, ne'ebé ita lalika mai ko'alia buat sira-ne'e sai hanesan aat loos tiha de'it ba Nação ida-ne'e, ninia aat mak barak liu.

Obrigada barak.

Sr.<sup>a</sup> **Presidente:** — Distintos Deputados, horas hatudu daudaun 12h32m, ainda faltam dois Deputados atu intervém e quatro Deputados para conclui declaração política, e, por último Sr. Vice-Ministro dos Assuntos Parlamentares. Ne'ebe, se bele permite, Deputado na'in-rua ne'e ha'u hapara, hela ba aban, que a Sr.<sup>a</sup> Deputada Anabela ho Sr. Deputado Virgílio Pereira. Ha'u mak sei ko'alia, ita bele rona malu, ne'ebe ha'u tau na'in-rua ne'e, se bele, aban inscreve.

Iha mós ponto de ordem lubuk ida, mas ponto de ordem...

*Estrondo.*

... Espera, ita rona malu. Se início do ano já estamos assim, ha'u preocupa. Ita-nia energia tem que usa ho didi'ak, tanba ita mós idade ba daudaun, ne'ebe iha tempo *fokus* ba Ita-Boot sira-nia intervenções. Ne'ebe, distintos Deputados, permite mai ha'u hasai tiha na'in-rua ne'e hela ba aban, e ha'u fó kedas tempo ba última intervenção, ba interveniente da Bancada da FRETILIN para conclui.

Halo favor.

*Sr. Deputado Antoninho Bianco husu atu halo intervenção.*

Seu nome não está aqui. Está bem? Mas eu não estou a abrir para discutir, ne'ebe ha'u fó kedas tempo ba Bancada da FRETILIN.

Halo favor.

Sr.<sup>a</sup> **Nurima Ribeiro Alkatiri** (FRETILIN): — Obrigada.

Sr.<sup>a</sup> Presidente do Parlamento Nacional, componentes da Mesa, Sr. Vice-Ministro, distintos colegas Deputadas e Deputados, povo Buibere no Maubere, Bancada FRETILIN nia declaração ohin nian mai, dala ida tan, lori preocupações ne'ebé afeta ita-nia população nia moris loroloron.

Estado, inclui Governo, iha dever atu harii condições no desenvolve Nação ba população bele moris ho digno, ho justiça, ho igualdade, infelizmente, ida-ne'e la'ós realidade iha Timor-Leste. Mesmo que balu temi katak iha esperança atu rona assunto foun iha tinan foun, maibé, bainhira problema husi tinan kotuk seidauk resolve to'o ohin loron no sai aat liután, assunto ne'e tem que levanta nafatin, hodi hatutan cidadão sira-nia halerik.

Saúde pública nia situação colapso sai evidente liután. Balu hakfodak, bá halo fiscalização urgente bá hospital atu taka falta mak mai ko'alia hanesan dados, e factos la vale. Maibé, molok balu hakfodak halo fiscalização, barak bá-mai hospital haree família no maluk sira ne'ebé moras no sente rasik, relata rasik, ami barak mós haree ho matan no sente rasik.

Lian português hatete, «o pior cego é aquele que não quer ver». Husi hospital duni mak fó-sai katak ema mate iha Hospital Nacional liu 600 iha tinan kotuk depois de baixa 48 horas nia laran, ne'e seidauk sura iha hospital no centro saúde sira seluk iha território nacional. Keta haluha mós ba problema falta ai-moruk no falta profissionais de saúde suficientes no qualificados atu responde ba necessidade setor nian iha Timor-Leste. Keta haluha mós katak Governo recusa atu aloca orçamento atu harii centro saúde especializado rua no atu reforça serviços saúde existentes. Tau orçamento boot liu ba setor saúde iha 2025 maibé la aloca ba linhas ne'ebé iha impacto ba serviço saúde pública. Serviço saúde pública iha território nacional tomak hasoru obstáculo barak liután tanba má gestão husi IX Governo. Sé mak continua nega colapso saúde pública tanba hakarak duni atu taka matan ba falta



condições serviço saúde no ai-moruk; sé mak continua nega tanba seidauk sente rasik ka la iha sentimento humano no la iha interesse ba povo.

Ho problema sira ne'ebé sistema saúde no educação hasoru, liuliu tanba falta gestão eficaz no falta competência husi IX Governo, ne'ebé lidera husi Primeiro-Ministro Xanana Gusmão, ba setor ne'ebé crucial ba povo nia moris, inclui husi Ministra Saúde no nia protetor no protegido sira, mak ikus ita haree tan *fashion show* iha Hospital Nacional. Ato ida-ne'e halo ema barak sente katak halo troça ba sira-nia terus bainhira bá buka atendimento iha hospital, no barak lakon sira-nia família tanba falta atendimento eficaz no falta condição ba profissional saúde sira atu hala'o sira-nia serviço. Justificativa katak ne'e tanba Hospital Nacional iha farda foun hatudu katak liderança setor saúde la iha noção ba prioridade setor ne'e rasik. Liderança ne'ebé di'ak tem que hatene analisa di'ak no buka *timing* loloos ba assunto ida-idak no hatene saida mak prioridade ba serviço ne'ebé precisa hala'o. Ho problema setor saúde no educação nian ne'ebé existe ona no barak tebes, ita haree tan despejo sira ne'ebé hala'o husi IX Governo liderado husi Primeiro-Ministro Xanana Gusmão, sem respeito ba ema nia dignidade no direitos constitucionais.

Atu halo despejo, iha processo legal ne'ebé necessário atu halo tuir. Atu halo despejo, tem que cria condição atu população sira ne'e bele muda ba, tem que iha plano integrado no ho respeito ba ema nu'udar humano. Plano ordenamento no plano urbano sira ne'ebé VIII Governo finaliza to'o ohin loron IX Governo ignora tanba de'it mai husi partido sira agora iha oposição, depois mak bá halo despejo sem plano, viola leis no direitos humanos sem hanoin ba consequência longo prazo ba sira ne'ebé husi kalan ba loron haree sira-nia moris no esforço atu buka moris-di'ak sai nulo.

Halo nu'usá mak bele halo cidade nabilan se la iha plano? Além de ida-ne'e, tanba despejo la tuir plano ida, ikus tau população sira ne'ebé afetado ba risco barak.

Ohin, dia 13 de janeiro, ano letivo foun hahú ona, oinsá ho labarik sira ne'ebé hetan evicção? Sé mak garante sira-nia transferência matrícula? Tempo udan boot hela, halo nu'usá mak atu garante prevenção ba moras sira hanesan dengue, gripe, *covid* no seluk tan? Halo nu'usá mak atu garante atendimento saúde eficaz ba ema moras? Serviço saúde, ne'ebé balu dehan di'ak hela, preparado ka lae? Ministério Saúde hadi'a ona problema ai-moruk? Resolve ona falta profissional saúde ne'ebé insuficiente? Resolve ona falta equipamento iha hospital no centro saúde sira? Halo nu'usá mak atu garante labarik no ema ferik no katuas sira-nia prevenção moras se sira la iha fatin atu muda ba depois de despejo? Dehan, solução mak lori ba município, ida-ne'e baseia ba saida? Se nune'e, significa katak ema hotu ne'ebé mai husi município sira tem que fila, inclui membro Governo balu? Ne'e la iha sentido no la tuir lei. Decisão atu lori ema ba município la'ós de'it injusto, maibé mós inconstitucional, contra artigo 44.º husi Constituição RDTL, «cidadão hotu-hotu iha direito constitucional atu ba mai no hetan nia hela-fatin iha território nacional nia laran...»

Sr.<sup>a</sup> **Presidente**: — Muito obrigada, conclui, Sr.<sup>a</sup> Deputada!

Sr.<sup>a</sup> **Nurima Ribeiro Alkatiri** (FRETILIN): — ...para concluir, ha'u fó-hanoin, la iha cidadão municipal, iha mak cidadão nacional, cidadão timorense e sira merece respeito».

Obrigada.

Sr.<sup>a</sup> **Presidente**: — De seguida, Bancada do KHUNTO.

Sr. **Luís Roberto da Silva** (KHUNTO): — Obrigado, Sr.<sup>a</sup> Presidente.

Relaciona ho ami-nia declaração política ne'ebé ohin dadeersan ami hato'o liuhosi Plenária ida-ne'e, atu hatete de'it katak husu ba XI Governo atu acelera processo projeto sira-ne'ebé ho situação emergência, liuliu estrada sira iha território nacional ne'ebé fó risco ba ita-nia movimentação, ba ita-nia comunidade sira hodi acesso ba mercado, ba educação, ba saúde no ba buat hotu. Ida-ne'e mak precisa, hodi acelera processo sira-ne'e, ne'ebé tama iha contexto emergência, então tem que responde mós ho emergência.

Ida-ne'e mak ha'u atu hato'o ba Sr. Vice-Ministro atubele encaminha ba Ministro das Obras Públicas hodi acelera processo sira-ne'e.

Inclui mós kona-ba eletricidade ne'ebé de vez em quando mate lakan mate lakan. Balu mós fa'an saldo eletricidade nian ne'e fatin balu dook tebetebes, comunidade sira mós la acesso atu sosa saldo no sira enfrenta duni problema ida-ne'e. Ne'ebe, karik Governo cria ona gestão ida atu ita-nia população contribui ho máximo, precisa mós cria condição no gestão ne'ebé di'ak, para ita-nia população sira-ne'e la'o besik. Satán tempo udan hanesan ne'e, iha fatin balu pré-pago sira ita usa saldo, maibé saldo ne'e hotu comunidade sira atu bá sosa mós dook demais, e depois sistema *error* tan, ida-ne'e mak dificulta ita-nia comunidade sira. Então ahi sira-ne'e mate lakan, de vez em quando estraga mós ita-nia população sira-nia sasán.

Depois, kona-ba saúde, ita precisa duni hadi'a nia gestão, ninia maneira atu fó atendimento público ba ita-nia cidadão sira, tratamento ho di'ak. Liuliu pessoal saúde, profissional sira-ne'e, ita tem que hatuur iha nia fatin para bele serviço ho profissional, selae neineik ita considera hospital Guido Valadares sai fali hanesan CCD hodi halo *fashion show* ka buat oioin iha-ne'ebá. Então ida-ne'e ita bele dehan katak halo troça duni povo, halo troça duni buat ne'ebé ita enfrenta hela, katak ai-moruk la iha, povo mós mate, de vez em quando tinan ida mate 600 ba leten. Ida-ne'e ita-nia sentimento humano ne'e iha-ne'ebé? Ita labele considera buat ne'e ki'ik ida. Ne'ebe ita, Deputado sira, ko'alia mós tem que ho fuan moos, labele tan poder oan sira-ne'e ita ko'alia buat ne'ebé loos mós sala, sala mós dehan loos. Ida-ne'e mak ladún furak ba ita, ne'e ka?

*Protesto husi Bancada CNRT.*

Ita-nia mandato ne'e hotu-hotu tinan lima hotu, Nação ida-ne'e sé mak sa'e ba ukun mós ukun bá, importante mak povo ne'e moris ho digno, tratamento ba povo ne'e ho digno para ita bele dehan katak di'ak. Se ita defende malu de'it katak A mak di'ak liu, B aat, B aat liu, A mak di'ak liu ou aat liu, ida-ne'e mós ladún di'ak ida.

Ha'u husu nafatin ba liderança, aman ba Nação sira-ne'e mak fó fuan, fó laran ba malu para bele cria condição di'ak ba ita-nia povo. Povo labele tanis beibeik tan, halerik beibeik tan! La sente ukun an nia desenvolvimento. Ita oan sira-ne'e di'ak, de vez em quando la afetado, mas balu afetado karik, pior liu karik, quando iha li'ur.

Ha'u ko'alia de'it hanesan ne'e, iha laran iha tiha ona sistema simu osan fulan ne'e mak ko'alia buat hotu-hotu dehan kabeer tiha de'it ne'e, mas iha li'ur ba mak enfrenta hahalok ida-ne'e hanesan ne'e ó tanis ka lae? Ita ko'alia loos de'it sá, lalika usa *topen* para ko'alia, ne'e ka? Ne'ebe importante mak halo tratamento ba ita-nia comunidade sira ho digno, liuliu ba labarik sira, estudante oan sira, inan-feton isin-rua ne'ebé agora iha quarentena ne'ebá ne'e fatin toba mós la iha, dada lona iha tasi-ibun sira-ne'e, estrada sira-ne'e hodi toba, ida-ne'e mak ita tem que haree. La'ós buat hotu-hotu «parabéns, parabéns!» Lae!

Ha'u aprecia ba colega balu ne'ebé dehan, «parabéns ba buat ne'ebé mamuk ida», ha'u ne'e contra buat ida-ne'e. Ha'u parabéns ba buat ne'ebé di'ak karik di'ak, parabéns buat mamuk ida, ne'e ha'u lakohi.

Ha'u-nia intervenção mak ida-ne'e, ha'u só fó-hatene nafatin ba Sr. Vice-Ministro, liuliu ha'u-nia intervenção ohin dadeer-saan ba folin *tiket* ne'e karun de mais, ne'ebe, de vez em quando ita-nia população hotu-hotu bá Kupang mak foin ba hola *tiket* iha-ne'ebá. Ne'ebe, mais ou menos liga mós ba Ministro dos Transportes para haree mós gestão ida-ne'e, hadi'a! Para iha futuro labele acontece tan hanesan ne'e. Karik Ministro la sente, maibé povo ne'e sente, povo ne'ebé ho economia ne'e ya... ne'e mak sente. Balu oan escola iha-ne'ebá, atu *wisuda*, *tiket* karun liu, tem que lakon osan transporte to'o Kupang, toba iha-ne'ebá kalan ida ka rua foin bá Bali, bá to'o Indonésia, e ida-ne'e mak precisa hadi'a.

Obrigado, Sr.<sup>a</sup> Presidente.

Sr.<sup>a</sup> **Presidente**: — De seguida, ha'u fó tempo ba Bancada do PD.

Sr. **António da Conceição «Kalohan»** (PD): — Muito obrigado, Sr.<sup>a</sup> Presidente.

Boa tarde ba ita hotu.

Declaração Bancada PD nian ne'ebé halo ohin halo ho intenção atu reforça serbisu Governo nian ho qualidade, organizado no coordenado, tanba ne'e mak ami apresenta ideais hanesan ohin ami temi, hodi dudu Governo hola ninia responsabilidade.

Bancada PD mós internaliza compromissos ne'ebé Governo hato'o iha debate do OGE 2025 nian, ne'ebé Sr. Primeiro-Ministro rasik mós haklaken ba ita hotu iha fatin ida-ne'e, katak tinan 2025 mak tinan ida ba implementação dos Programas do Governo. Tanba ida-ne'e ami, ho consciência tomak, ho sentido de responsabilidade, ho mós moral, atu nafatin fó-hanoin ba Governo hodi exerce ninia serviço sira, cumpre compromissos ne'ebé ita halo, hodi bele lori duni desenvolvimento la'o iha tinan 2025.

Bancada PD mós halo declaração ne'e hodi nafatin exerce nia função de controlo nu'udar Deputado, la'ós Executivo. Bancada PD ninia Deputados iha dever moral atu nafatin hafanun Governo ba ato sira-ne'ebé precisa atu corrige. Corrige, fó-hanoin atu corrige la significa contra, maibé atu halo di'ak liután, nune'e bele fó qualidade de prestação de serviços ba ita-nia Rain, ba ita-nia povo.

Ba maluk independentista sira hotu com certeza lembra ho memória fresca, bainhira iha tempo ocupação hotu-hotu contesta duni desenvolvimento hodi dehan, «*pembangunan untuk manusia*». Tanba intimidações ita lakohi, limitação da liberdade ita lakohi, tanba ida-ne'e mak ita mós contra inimigo ho ninia lacaio sira, ho ninia cooperador sira iha passado ba. Agora, sim, ita hotu hakarak desenvolvimento, mas la'ós desenvolvimento ida-ne'ebé tem que ser la'o ho dalan ida-ne'ebé espontâneo, halo iha tempo ida-ne'ebé la apropriado. Ne'e dever Deputado nian ne'ebé sente povo nia voto ne'e nian todan.

Se ita hotu iha hanoin ida katak ita simu voto ida-ne'e nu'udar todan ida ba ita, ita mós labele hatodan sira ho hahalok ruma ne'ebé ita haree la di'ak mas ita orgulho tan de'it ita mós iha Governo, e, Bancada PD la existe ba ida-ne'e. Ho consciência, hanesan cidadão, atu nafatin contribui ba desenvolvimento, maibé mós labele nonook ba lian ne'ebé la iha lian. Ida-ne'e mak PD, desde uluk to'o agora.

Tanba ne'e, Sr. Ministro, ami husu tebes, ha'u haruka partilha declaração da bancada liuhusi Ita-Boot, atubele sai mós hanoin ruma ba Governo. Ami la pretende atu hanorin, maibé ami iha obrigação mós atubele fó-hanoin.

Ida-ne'e de'it mak hato'o, muito obrigado.

Sr.<sup>a</sup> **Presidente**: — De seguida, ha'u fó Bancada do PLP.

Sr.<sup>a</sup> **Maria Angelina Lopes Sarmiento (PLP)**: — Muito obrigada, Sr.<sup>a</sup> Presidente.

«Fatos sei labele argumenta ho argumento político atu defende malu, buat ne'ebé sala ita dehan sala. Ita-Boot sira ko'alia baseia ba publicação iha mídia social, ha'u ko'alia baseia ba factos ne'ebé ha'u haree ho ha'u-nia matan rasik.

Ponte Comoro III iha Fomento II hahú construção iha 2016, finaliza iha agosto 2018. Iha momento ne'ebá população barak hahú hela iha-ne'ebá. Momento harii construção to'o finaliza hala'o iha V no VI Governo ne'ebé lidera husi CNRT, tanbasá mak tinan hirak ne'e la aplica regras ho rigor no bandu ema halo construção? Tuir loloos tau placa katak fatin ne'e área protegida. Wainhira ema foin fakar rai-henek, bá hasé no bandu kedas! Ema hada *batako*, bá hapara kedas! Ne'e duni, falha iha *monitoring* no aplica regras rigorosas husi Governo rasik ne'ebé lidera husi CNRT.

Ha'u sente tebes, hanesan inan no biin ida, hasoru inan sira-ne'ebé hasai matan-been. Hanesan membro GMPTL, Deputada feto ida, ha'u haree la aguenta, inan sira ho matan-been mai hasoru ha'u, família balu hela iha lona okos, tuur fó susu hela bebé, iha tempo hanesan udan-been turuk habokon sira-nia isin husi lona koak.

Sira atu bá haris-fatin, haris-fatin la iha, empresta de'it vizinho sira-nia haris-fatin. Sasán ho armário sira soe de'it iha estrada ibun. SEATOU promete atu tula, mas Governo prepara de'it carreta lima. Udan tau halo estraga hotu, cama no sasán sira-ne'ebé assegura iha ponte okos ne'e mak seguro liu.

Facto ida-ne'ebé iha, informação husi Ita-Boot sira-nia estrutura duni ne'ebé haknaar an iha PAM Díli dehan, tuir loloos uma-kain ualu de'it mak ameaçado, nune'e sira consegue evacua duni uma-kain ualu ne'e, uma-kain 288 ne'e bele hasai neineik no faseada, tanba seidauk tama iha risco aas. Maibé, máquina ba suru sira-nia uma iha dia 2, dia 2 kalan bá duzentos oitenta oito famílias, husik sira hela naklekar iha li'ur ho sasán sira, lalar hobur, higiene la iha, haris-fatin la iha, buat hotu la iha no to'o dia 8 mak luflafu bá quarentena.

Parlamento Nacional nia knaar halo lei no halo política, ida-ne'e mak ita tuur ho gravata, iha dignidade aas, tuur iha AC laran. Mas, ha'u lae, tanba Constituição fó competência de fiscalização ne'e mak ha'u bá halo fiscalização iha terreno, la'ós iha surat-tahan no la'ós iha AC laran.

«Sr. Germano ne'ebé agressivo tebes», Ita-Boot sira la concorda karik ho liafuan ida-ne'e, se bele hasé mós Sr. Presidente da República ne'ebé bolu Sr. SEATOU «buatamak», empresta Presidente da República nia liafuan, ne'ebé liafuan ida-ne'e Ita-Boot sira hasé mós ba Sr. Presidente da República bá.

Nia foin to'o fase aviso de'it iha setembro no tau enumeração ba ema nia uma. Nia promete dehan «imi hein de'it, antes ami mai halo evicção, ami sei mai avisa», Sr. Germano la'o lakon tiha durante fulan haat. Be nu'usá fulan haat ne'e la acontece tiha ba ema sira-ne'e, indemniza tiha sira? Sira sei sai nonook de'it. Iha 2 de janeiro, sem notificação, bá suru de'it.

Facto seluk, Governo prepara de'it lona 22, husi 288 famílias ne'ebé iha hetan de'it lona 22 fahe ba sira. Ida-ne'e ha'u ko'alia direta ho comunidade sira no Chefe Aldeia Fomento II, naran Domingos. Deputado ne'ebé bá haree ne'e depois rai fuik ona mak bá, ne'e *salam kaset (kasian engkau terlambat)* de'it. Tanba sá la brani bá hasoru população sira iha tempo situação desorganizado husi dia 2 to dia 8? Destruição massiva, aat liu fali iha 1999.

Hanesan feto, ne'e ha'u-nia missão ida atu ko'alia hasoru SEATOU ne'ebé halo tratamento ba oan nurak, bebé ki'ik, isin-rua no ferik katuas sira la ho digno. Sorte be ha'u bá fiscaliza, hodi nune'e acontece kedas loraik ne'e obriga ema lori ema ba quarentene. Se la bá mós efeito la iha karik ...

*Protesto husi Bancada CNRT.*

... Sr. Germano foin mak sai Sr. Secretário de Estado, maibé CNRT ukun kleur ona, mais experiente iha Governo. CNRT iha ona experiência halo despejo administrativo ba população sira iha *Suai Suplay Base*, hanesan Suai ho Beço, iha memoria institucional ona. Bele husu ba Sr. Francisco Monteiro, atual Ministro, nu'udar Presidente *Timor Gap*, kapás tebetebes, ami, quando bá Suai, ema aprecia tanba iha fatin alternativa ba sira hodi sees. Memória institucional seluk husi IX Governo ba população mak Tasi-Tolu to'o aeroporto, Kampung Alor. Saida mak acontece? Governo indemniza uluk, sira voluntariamente sai de'it, molok máquina tun, rai fuik tiha ona.

Sr.<sup>a</sup> **Presidente:** — Muito obrigada.

Sr.<sup>a</sup> **Maria Angelina Lopes Sarmento (PLP)** — Facto ida-ne'e mak ami hakarak ko'alia iha-ne'e. Obrigada.

Sr.<sup>a</sup> **Presidente:** — Distintos Deputados, ita remata ona ho intervenções.

Sei iha ponto de ordem, mas ha'u fó uluk ba Sr. Vice-Ministro atu hatán tiha tanba são quase 1h00. Ne'ebé, foram 23 Deputados, 21 Deputados mak ko'alia.

Ha'u husu ba Sr. Vice-Ministro para, iha assuntos balu ne'ebé la consegue, bele por escrito. Ne'ebe, halo favor, tempo Ita-Boot nian.

Sr. **Vice-Ministro dos Assuntos Parlamentares** (Adérito Hugo da Costa): — Muito obrigado, Sr.<sup>a</sup> Presidente Parlamento Nacional, boa tarde.

Distinto Deputado sira hotu, ha'u la fó resposta barak liu, la to'o 10 minutos tan, mas hakarak hatete de'it katak iha declaração política haat, ami agradece tebetebes, aprecia expressão bancada haat

ninian ba ponto situação desempenho IX Governo nian ba assunto lubuk ida, desde saúde to'o iha evicção.

Sr. Deputado sira hotu, experiência IX Governo nian liga ho evicção ka despejo administrativo sira, ami iha separação ba assunto rua: ida, kona-ba despejo administrativo ida ami halo ona iha último ano, iha ami-nia mandato, IX Governo nian, mak liberta população sira ba implementação projeto *The Millennium Challenge Account* (MCA), ba obra *fiber optic* nian, ne'ebé VIII Governo identifica rai iha Bebonuk. E processo aproximação sira-ne'e halo ho aproximação sira dehan tuir regras ne'e, ne'e mak cada família, cada uma halo aproximação husi Ministério da Justiça, nune'e la'o tempo naruk tanba balu concorda e balu la concorda. Balu ne'ebé concorda, Governo fó kedas compensação tuir lei para sira liberta rai ne'e, Governo bele continua ona atu implementa, e balu la concorda, aguarda nafatin negociação ba comunidade sira afetada ba rai ne'e. Ba rai ida-ne'ebé população sira-nia rasik, uma, rai, sira-nian rasik, documento completo, ne'e aproximação no negociação sira-ne'e la'o ho regra sira-ne'ebé iha. Experiência mak ida-ne'e. Agora ami mós la halo daudauk atuação balu que, iha contexto ida-ne'e, hanesan. Agora, classificação ba intervenção seluk ba comunidade sira mak, ida, comunidade sira afetado ne'ebé hela iha terreno ne'ebé la'ós sira-nian, hela iha espaço ne'ebé considera espaço público, e Governo sira uluk mós notifica sira ona, bá halo levantamento, regista dados estatística dala hira ona, Governo sira uluk, lori hatete katak proibido, labele halo construção. Até uma ne'ebé uluk sira ocupa iha tempo Indonésia nian mós la autoriza atu halo construção, a não ser nia halo pedido ba Governo, ba Ministério da Justiça atu halo arrendamento ba médio ou longo prazo de acordo ho lei. Mas, barak liu, tanba la bele halo ida-ne'e, la bele compromete ho Governo atu husu ba terras propriedades atu fó contrato ida ba longo prazo para nia bele halo construção ba uma permanente, tanba ne'e mak sira hela nafatin ho uma sira condição aat, husik hela uluk desde sira ocupa. Ne'e regras husi Governo sira uluk mak introduz hela. Regista mós iha estatística, censo dala hira bá halo, regista, declara, «rai ne'e sé nian, uma ne'e sé nian», hatete iha estatística iha censos ne'e dehan katak «uma ne'e la'ós ha'u-nian, rai mós la'ós ha'u-nian. Ha'u hela iha 1999. Ou ha'u hela iha 2006, ha'u hela iha pós-crise, ha'u hela depois de ha'u sai husi jardim, depois de hetan compensação mak ha'u mai hela iha uma ne'e». E, sira hatene rasik estatuto ocupação rai ho uma ne'e, tanba ne'e mak sira mós la halo uma di'ak, e labele duni tanba husi Terras e Propriedade hatete ona ba sira ka alerta ona ba sira katak regista iha estatística ka censos sira, «rai ne'e la'ós sira-nian no uma ne'e mós la'ós sira-nian».

Se Excelência sira acompanha karik, iha fulan hirak liubá, Terras e Propriedade halo intervenção ba família ida iha Colmera. Nia ocupa uma ne'e iha 1999 e nia atu halo construção, Terras e Propriedades tun kedas halo intervenção dehan, «Lae, Ita-Boot la autorizado atu halo construção uma permanente», e sobu, ho duni equipamento pesado mak bá sobu.

Ne'e exemplo para ita separa, assunto rua ne'e la hanesan.

Agora, intervenção ba comunidade sira hela iha espaço sira hanesan Fomento II ne'e ho consideração ida-ne'e, sira rasik mós considera katak ne'e la'ós fatin sira-nian. Regista iha censos e sira barak mós la'ós sira mak halo, ema ocupante ida bá ocupa tiha desde terreno ne'e mamuk, hanesan ohin dehan, katak Ponte Comoro III depois de construção, espaço ne'e mauk hela, balu bá ocupa tiha depois halo fali uma hodi fó *kos* ba comunidade sira, inclui estudantes, inclui família sira. Ne'e mós dados ne'ebé Ministério da Administração Estatal, SEATOU halo hela, antes de sira tau número tinta mean ba uma hirak ne'e desde agosto 2023.

Sr. Deputado sira hotu, ba comunidade sira ne'ebé tau ona número husi IX Governo, ida mak Fomento ne'e to'o kraik mota-ibun, to'o tasi-ibun ne'e voluntariamente população sira agora liberta hotu ona, inclui mai *Pantai Kelapa* nian, mai *Pertamina* nian. Número tau hotu ona, e, fatin sira-ne'e sei la iha tan opção seluk. Número, quando tau ona, ne'e notifica katak «Ita-Boot considera katak fatin ne'e la'ós ona Ita-Boot nian, fatin ne'e privado e tem que voluntariamente halakon», e, rai ne'e la'ós considerado hanesan rai privado, uma mós uma halo temporário de'it.

Agora, questão sobre compensa ka lae, sim, compensação iha! Número, valor ne'ebé iha hanesan ho sira uluk iha fatin seluk ne'ebé halo evicção, e processo pagamento halo depois de abertura sistema iha quarta-feira semana kotuk lokraik, quando Ministério das Finanças, através de convocatório reunião nacional ida ba direção nacional sira, halo abertura ba sistema execução ninian. Desde dia 8 de janeiro 2025, quarta-feira, semana kotuk lokraik, sistema loke e ministérios relevantes ne'ebé responsável bá halo compensação ba valor sira-ne'ebé iha ona, halo hela processo ona ho Ministério das Finanças para halo levantamento osan sira-ne'e atu halo pagamento ba afetado sira.

Portanto, número sira ne'ebé tau ne'e iha-ne'e *target* ba evicção e la'ós uma privado, la'ós construção uma permanente, tanba ne'e mak sira taka de'it ho kaleen, nahe de'it cimento tanba alertado ona husi Governo sira uluk kedas, só que la halo execução, lakohi executa.

Ami mós buka hela uma *selter* 4 mil ne'ebé dehan VIII Governo husik hela iha Hera, mas la iha ida, iha terreno la iha, uma ne'e. Se iha karik, kala ami lori bá, tanba la iha ne'e mak usa fatin ida iha Tasi-Tolu ne'e, enquanto antes ne'e usa fatin seluk-seluk mak tem que halo moos no hadi'a e depois comunidade afetado sira bele lori tesik ba, quando sira hotu comprometido ona, pronto atu Governo prepara de'it carreta para atu tula ba iha sira-nia hela-fatin origem. La regista balu halo resistência dehan lakohi sai, coordenação di'ak.

Karik sei iha falhanço ruma, hanesan ohin declaração PD nian ho seluk-seluk tan, ami regista ida-ne'e para corrige ba próxima evicção ne'ebé tem que halo e sei la pára tanba, se pára, sei hamosu injustiça ba sira seluk. Husik, depois culpa ita hatudu ba malu. Governo ida-ne'e hakarak duni fó justiça mós, se evicção ba sira seluk halo ona, sira seluk ne'ebé hanesan hela, usa hela estatuto rai hanesan no sira seluk husik hela, ne'e mós la justo. E, ha'u fiar katak sira hatene e sira cumpre hela, sira hein hela, só que la sério ne'e mak problema ne'e. Uluk halo levantamento, halo mós diálogo,



Governo sira uluk halo mós diálogo ho comunidade sira. Sira dehan: «hein de'it, ami hein de'it atu sai», só que la iha, la implementa, la hatene tanba razão saida. Mas, Governo ida-ne'e hakarak implementa, promete atu halo e tem que, promessa ne'ebé Governo halo em nome de Estado, tinta ne'ebé tau número ne'ebá ne'e número ne'e tau em nome de Estado, sala ka loos responsabilidade Governo nian, mas tem que implementa. Selae, ita hatete de'it sira, «labele halo construção, ó hela uma aat nafatin, ó hela iha condição aat ne'e nafatin, mas labele halo, Governo la autoriza», ne'e mós ita sala. Oinsá nia atu hadi'a nia saúde família nian, oan sira-nian quando ita dehan, «ó hela ba mas labele halo construção, labele hadi'a uma ne'e tanba uma ne'e Estado nian no rai ne'e mós Estado nian»? Ne'e justo ka lae? Iha vinte e tal anos ita alerta de'it ba sira katak «labele halo construção, labele hadi'a uma ne'e», casa de banho aat husik de'it, ne'e mós ita la loos, responsabilidade Estado ninian.

Sr. Deputado sira hotu, ha'u sente, pergunta sira ohin ha'u sei envia ba ha'u-nia colega membro do Governo sira atu fó resposta.

Ha'u hakarak fó resposta de'it ba Bancada KHUNTO nian ida kona-ba estrada iha Lospalos. Sr. Deputado sira hotu, acompanha to'ok iha portal, desde fim do ano 2024 to'o início tinan 2025 ninian, foin loron hirak liubá mós lança tan ona abertura ba *tender* ba troço estrada principal sira ne'ebé, tuir IX Governo haree, tem que halo construção. Tanba sasán sira ne'e envolve montante orçamento milhões de dólares, tuir regras tem que halo *tender*. *Tender* iha ninia prazo. Por exemplo, estrada principal ida abandonada hela iha tinan barak nia laran mak Lospalos ba Iliomar, *tender* tiha ona, e continuação *tender* iha parte sul sira-ne'e Iliomar ba parte sul ninian to'o Viqueque, husi Same nian parte sul nian sa'e mai Betano tesik ba, *tender* hotu ona. Sr. Deputado sira bele acompanha iha Portal do Governo, karik ha'u ko'alia ne'e sala, para verifica. Tanba questão ne'e montante osan ne'e boot, ita-nia regras aprovisionamento mak haruka, processo ne'e kleur. Maibé, levantamento dados sira-ne'e halo kleur ona.

Sr. Deputado sira hotu, iha levantamento ida que envolve *konsultan*, estrada estratégico iha parte central ba sul nian que VIII Governo halo gasta 600 mil dólares, troço ida husi Turiscai tun ba Alas tasi, 600 mil *konsultan* nian hodi halo levantamento e la halo *tender*. Agora IX Governo haree hela ida-ne'e para oinsá continuação ne'e, tanbasá mak la halo. Halo tiha levantamento, gasta tiha 600 mil dólares ba de'it halo consulta depois la continua. Troço ida-ne'e importante loos ba comunidade sira isolado iha tinan barak nia laran iha parte Turiscai ba Natarbora, ba Alas até ba Laclúbar, Manatuto nian, fatin ne'ebé produção café boot, produção animal sira rico tebetebes iha-ne'ebá mas abandonado iha tinan barak nia laran. Loke ponte estratégica sira iha parte sul ninian, hanesan Same atu liga posto Alas no posto Fatuberliu, Turiscai iha parte Same nian Mota Karau-Ulun ohin Sr. Deputado balu temi, la'o hela, Sr. Deputado sira hotu.

Governo mós aprova tan, halo revisão ba Lei Aprovisionamento, la'ós para halo flexível demasiado maibé regras ne'ebé ita halo desde IX Governo tama, halo avaliação no diagnóstico ba regime aprovisionamento sira, ami haree katak precisa halo revisão para depois processo hirak ne'e bele iha andamento, nune'e fó resposta ba plano sira-ne'ebé ita halo ona ba construção obra pública ninian.

Sr. Deputado sira hotu, kona-ba assunto ida ocupação rai, hanesan Deputado balu foti iha semana kotuk, ohin Deputado Leandro temi ona, ocupação através de arrendamento ba Terras e Propriedade ne'e legal. Iha arrendamento balu ne'ebé temporário, la'ós carácter halo atividade comercial ninian mak ida uluk regime desde antes crise fó ba comunidade sira ocupa espaço público hanesan uma Estado ninian no rai Estado ninian ho 25 dólar, 20 dólar, 15 dólar. Regime ne'e mak existe hela iha Terras e Propriedades to'o agora. Sira ne'ebé hakarak hasa'e ba ocupação ho atividade comercial nian mak sa'e ba ida arrendamento médio, longo prazo ninian hodi selu 200, 300, 500 ou 1000 dólares, depende classificação rai ho uma ninian ne'ebé sira ocupa. Ne'ebe, Sr. Deputado sira, buat hotu la'o hela tuir regras, regras ne'ebé estabelece, sistema ne'ebé ita estabelece mak Governo la'o tuir hela no la inventa buat ruma no la halo buat ruma, de acordo ho lei. Ohin ha'u dehan ona, ba caso evicção ba ocupação sira-ne'e ami usa regime ne'ebé iha ona desde uluk ba compensação ho número ne'ebé Governo sira anterior fixa ona, seidak aumenta valor ruma maibé montante ida iha-ne'e mak Governo sei nafatin usa hela ne'e. Fora husi evicção ba rai privado sira, ne'ebé hanesan ohin haú dehan ona, caso concreto Governo ne'e enfrenta mak liberta família lubun ida iha Bebonuk hodi implementa obra ida *Millennium Challenge Account*, ne'ebé Parlamento Nacional uluk aprova através de resolução ida, ratifica acordo ne'e hodi implementa projeto husi Estados Unidos da América mais de 400 milhões de dólares.

Governo anterior seidak consegue liberta rai ne'e husi comunidade, na'in-sira, e IX Governo lori quase tinan ida halo negociação ba rai-na'in sira, uma-na'in sira para bele concorda ho negociação ho oferta cálculo custo indemnização cada metro quadrado. Depois de tinan ida mak ita foin bele hahú implementação projeto ne'e.

La fácil, Sr. Deputado sira, uma ne'e ema nian rasik, iha documento, ne'e processo ita usa ho Lei Expropriação ne'ebé ohin Sr. Deputado Joaquim dos Santos temi. Ha'u hakarak explica ne'e dala ida tan para público bele hatene questão rua ne'e, separa questão rua ne'e, expropriação ba uma ho rai ne'ebé na'in rasik la hanesan ho libertação, evicção ba ocupantes rai sira la'ós na'in e rai sira-ne'ebé estatuto ne'e fixa hotu ona, alertado hotu ona ba sira.

Ida iha Ai-tarak-Laran no Mota Maloa ne'e desde Governo sira uluk mós la autoriza, «labele halo construção», tanba ne'e mak sira didin uma ne'e ho kaleen to'o agora, sira cumpre. Ida Palácio Ai-tarak Laran nian oin ne'e ita hotu assiste hela loron kalan, tinan ruanulu resin ona ita assiste hela ida-ne'e, la iha construção ida permanente iha-ne'ebá tanba sira cumpre orientação Estado nian. La iha ida halo uma andar ho material construção ida permanente, ne'e ita tem que justo mós haree factos ne'e,

katak sira mós cumpre hela. Sira hatene hela katak sasán la'ós sira-nian e sira hatene katak «loron ida Governo tem que mai hasai ita», ne'e mós factos, tem que aprecia ba sira-ne'e, tem que aprecia ba sira-nia obediência, obedece ba regras, ba orientação ne'ebé Governo sira uluk fó hela, tan ne'e mak sira halo restaurante mós sira halo ho kaleen de'it, material construção ida provisória, la'ós permanente.

Sr. Deputado sira bele bá haree, desde ponte ne'e to'o tasi-ibun, la iha construção permanente. Hanesan mós sira iha tasi-ibun Pantai Kelapa *Pertamina* nian tesik ba, la halo uma permanente tanba sira hatene katak sasán la'ós sira-nian, sira hetan alerta husi Governo katak sasán la'ós sira-nian e la merece atu halo construção permanente.

Hanesan mós sira-ne'ebé iha mota-ibun Fomento II ne'ebé iha, la iha uma permanente, carácter provisório hotu tanba sira hatene sasán la'ós sira-nian, sira hatene katak labele halo duni uma permanente. Ne'ebe, iha momento discussão sira hanesan ne'e ita sensibiliza mós povo ninia posição, valoriza netik mós sira katak sira mós fiar, sira mós cumpre, sasán Estado nian Estado nian.

Questão técnica implementação sira, iha sala ruma, ha'u regista ida-ne'e, IX Governo pronto atu corrige ba medida sira tuirmai. Rona husi Sr. Deputado sira-nia intervenção sira, declaração política sira, ami regista ponto sira-ne'ebé bele corrige ba hahalok ruma tuirmai atu di'ak liután. Mas, di'ak liután, Sr. Deputado sira, ami mós regista hela, ha'u informa ona iha reunião Conselho de Ministros iha semana kotuk, sobre declaração política Bancada FRETILIN nian atu halo interpelação ba evicção ninian. Ami hein hela para fó-hatene ami hodi prepara. Quando agenda ne'e iha ona Parlamento, ami, liuliu membro do Governo sira competente, bele mai discute ho Sr. Deputado sira.

Sr. Primeiro-Ministro disponibiliza ona, membro do Governo hotu-hotu orientado atu tun, mai Parlamento e husu ba Sr. Deputado sira atu halo fiscalização forte liután tanba tinan ida-ne'e tinan implementação.

Sr. Deputado sira, se haree visita intervenção direta ba hospital, visita direta Sua Excelência Primeiro-Ministro nian bá ne'ebá, tau sinal ba ita katak Sr. Primeiro-Ministro tau atenção séria ba assunto saúde ninian, rona mós intervenção Sr. Deputado sira-nian, tan ne'e mak Sua Excelência Primeiro-Ministro halo visita surpresa ba hospital.

Quando Sr. Primeiro-Ministro visita mós ba atuação evicção iha Fomento II, hatudu Sua Excelência Primeiro-Ministro haree assunto ne'e sério, tan ne'e mak Chefe do Governo tun direta.

Hanesan membro do Governo, ami hatene katak se Sua Excelência tun direta ba terreno ba ami-nia campo, ami sente katak sasán ne'e sério, e ha'u hein katak ha'u-nia colega sira-ne'ebé ninia problema Sua Excelência Primeiro-Ministro tun to'o terreno bá haree, sira sente sira-nia an katak assunto ne'e sério. Tanba ne'e mak Parlamento Nacional mós sério liután ba agenda sira, assunto sira ita temi baibain dehan ne'e assunto nacional, assunto povo, direto povo nian viola, viola Constituição, viola norma sira internacional, viola princípio sira di'ak husi ONU ninian sobre evicção, hahalok evicção

ne'ebé di'ak, boa prática sira-ne'e, halo convocatório bá! IX Governo mai para ita discute conceito-conceito mais ideal, mais perfeito ne'ebé tuir Sr. Deputado sira dehan iha, iha mundo ne'e, ba modelo atuação sira-ne'e iha ita-nia região e karik mós iha Nação sira avançado ona.

Obrigado.

Sr.<sup>a</sup> **Presidente:** — Muito obrigada.

Sr. Vice-Ministro, tempo mak impede ita atu ko'alia ba nafatin.

Distintos Deputados, permite ha'u, ita sei iha agenda ida ba Período da Ordem do Dia, já foi corrigido, ne'ebe ita prepara ba vota.

Muito embora iha pedido ponto de ordem, mas ha'u espera katak aban bele regista para halo intervenções.

Distintos Deputados, ita iha série tolu, permite ha'u...

*Bainhira Sr.<sup>a</sup> Presidente ko'alia hela, Sr. Deputado Joaquim dos Santos husu tempo atu halo intervenção ...*

... espera, depois de votação ha'u fó tempo Ita-Boot ko'alia, pode ser?

Ita vota tiha lai, selae orsida ha'u haree hamriik ida-ida, tanba ne'e ita-nia matéria ne'ebé halo tiha ona correções para fó valor ba ita-nia transcritor sira halo iha-ne'e. Depois de ida-ne'e, ha'u promete fó tempo ba Ita-Boot.

Ne'ebe, distintos Deputados como ne'e corrigido iha série tolu, se hakarak vota dala ida então ita prepara ba votação tanba ida-ne'e sei bá publicação.

Distintos Deputados, ita aprova, bele prepara cartões para votação, ba série n.º 14, n.º 15 ho n.º 16. Ne'ebe, prepara ba votação.

Quem vota a favor, contra no abstenção.

*Deputado sira hala'o votação ordinária.*

Muito obrigada.

Maibé, ha'u atu fó-hanoin de'it, distinto Deputado sira ko'alia tiha iha-ne'e e depois vota abstenção fali, quem vai responsabilizar? Ne'ebe, responsabilidade ita ne'ebé ko'alia mak hakerek iha-ne'e.

*Hato'o ona ba votação no hetan ona aprovação ho voto a favor 38, contra 0 no abstenção 4.*

Ne'ebe ha'u husu ba sira-ne'ebé abstenção, lê didi'ak fali saida mak ko'alia para Ita-Boot sira la responsabiliza. Ne'ebe, dala ida tan série tolu ne'e passa.

Muito obrigada.

Sr. Vice-Ministro, ha'u agradece tebes ba Ita-Boot nia explicação, mas por escrito também podemos completar bainhira precisa lori mai.

E dala ida ha'u segure para ita iha debates iha Parlamento ida-ne'e para tornar mais efetivo.

Ne'ebe, ikusliu ha'u fó ba Sr.<sup>a</sup> Deputada Cedelízia.

Halo favor, tempo Ita-Boot nian.

Sr.<sup>a</sup> **Cedelízia Faria dos Santos** (CNRT): — Obrigada, Presidente.

Tanba ita aprova tiha ona, ha'u ko'alia de'it para próxima ita-nia relatório karik ita tem que hadi'a di'ak liután, liuliu ho liafuan sira-ne'ebé ita ko'alia por propósito mós hakerek hotu iha laran. Balu dehan katak «Deputado ida-ne'e ko'alia», «Deputado CNRT hakilar», «bassa liman», «Primeiro-Ministro dehan “ha'u fuma cigarro”», buat sira-ne'e mós hakerek hotu iha laran.

Tanba ita aprova ona, mas ba oin ne'e favor ida ita hadi'a.

Iha OGE 2023 ita ko'alia katak relatório e parecer Comissão C iha-ne'ebá, mas ita nunca hakerek buat ida, pelo menos recomendação buat ruma kona-ba ida-ne'e, maibé ita tau loos de'it.

Ikusliu, Presidente seidauk to'o um minuto be ha'u sugere, se bele, cada tinan ne'e ita-nia serbisu ne'e ita resolve tiha hotu, agora ita foin mak aprova 2023, agora ita iha 2025, ha'u-nia sugestão de'it tanba ita aprova ona então melhora di'ak liután.

Obrigada, Presidente.

Sr.<sup>a</sup> **Presidente**: — Muitíssimo obrigada.

Ha'u aproveita fó-hanoin, distintos Deputados, isto é uma transcrição, transcritores labele diminui nem aumenta. Ita hamnasa, ita me'ar também está ali, ou ah também está ali, ne'ebe, cuidado ko'alia. Aban-bainrua ne'e publica iha ita-nia *site*, ne'ebe hakarak ka lakohi ida-ne'e mak bá duni.

Muitíssimo obrigada, não é nenhuma súmula nem uma ata.

Ne'ebe, dala ida tan muitíssimo obrigada, bom trabalho e até amanhã.

Sr.<sup>a</sup> *Presidente taka sessão plenária ne'e iha tuku 1 liu minuto 19 lokraik.*